

ओं नमः परमात्मने, श्री महागणपतये नमः,
श्री गुरुभ्यो नमः, ह॒रिः ओं

कृष्ण यजुर्वेदीय तैत्तिरीय संहिता पद पाठः
(वाक्य सहित)

षष्ठकाण्डे तृतीयः प्रश्नः

Notes:

1. Please refer to the book “TS Kandam 1” and “TS 1.1 pada paadam with Vaakyam” for notes and conventions used in this Compilation.
2. Please download our vedic compilations from our web site www.vedavms.in

Contents

6 कृष्ण यजुर्वेदीय तैत्तिरीय संहितायां पद पाठे षष्ठं
काण्डं 3

6.3 षष्ठकाण्डे तृतीयः प्रश्नः – सोममन्त्रब्राह्मणनिरूपणं... 3

ओं नमः परमात्मने, श्री महागणपतये नमः,

श्री गुरुभ्यो नमः, हरिः ओं

6 कृष्ण यजुर्वेदीय तैत्तिरीय संहितायां पद पाठे षष्ठं काण्डं

6.3 षष्ठकाण्डे तृतीयः प्रश्नः – सोममन्त्रब्राह्मणनिरूपणं

TS 6.3.1.1

चा॒त्वा॒ला॒द्-धि॒ष्णि॒या॒नु॒प॒ व॒प॒ति॒ यो॒नि॒र्वै॒ य॒ज्ञ॒स्य॒ चा॒त्वा॒लं॒ य॒ज्ञ॒स्य॒
स॒यो॒नि॒त्वा॒य॒ दे॒वा॒ वै॒ य॒ज्ञं॒ प॒रा॒ज॒य॒न्त॒ त॒मा॒ग्नी॒द्धा॒त् पु॒न॒र॒पा॒ज॒य॒न्ने॒त॒द्वै॒
य॒ज्ञ॒स्या-प॒रा॒जि॒तं॒ य॒दा॒ग्नी॒द्ध्रं॒ य॒दा॒ग्नी॒द्धा॒द्वि॒ष्णि॒या॒न् वि॒हर॒ति॒ य॒दे॒व॒
य॒ज्ञ॒स्या-प॒रा॒जि॒तं॒ त॒त॒ ए॒वैनं॒ पु॒न॒स्त॒नु॒ते॒ प॒रा॒जि॒त्ये॒व॒ ख॒लु॒ वा॒ ए॒ते॒
य॒न्ति॒ ये॒ ब॒हि॒ष्प॒व॒मा॒न॒ꣳ सर्प॑न्ति॒ ब॒हि॒ष्प॒व॒मा॒ने॒ स्तु॒त- [] 1

TS 6.3.1.1 - Padam

चा॒त्वा॒ला॒त् । धि॒ष्णि॒या॒न् । उ॒पे॒ति॒ । व॒प॒ति॒ । यो॒निः॒ । वै॒ । य॒ज्ञ॒स्य॒ ।
चा॒त्वा॒ल॒म् । य॒ज्ञ॒स्य॒ । स॒यो॒नि॒त्वा॒ये॒ति॒ स॒यो॒नि॒ - त्वा॒य॒ । दे॒वाः॒ । वै॒ ।
य॒ज्ञ॒म् । प॒रे॒ति॒ । अ॒ज॒य॒न्त॒ । त॒म् । आ॒ग्नी॒द्धा॒दि॒त्या॒ग्नि॒ - इ॒द्धा॒त् ।
पु॒नः॒ । अ॒पे॒ति॒ । अ॒ज॒य॒न् । ए॒त॒त् । वै॒ । य॒ज्ञ॒स्य॒ ।

अपराजितमित्यपरा – जितम् । यत् ।

आग्नी॑द्ध्र॑मित्याग्नि॑ – इद्ध्रम् । यत् ।

आग्नी॑द्ध्रादित्याग्नि॑ – इद्ध्रात् । धिष्णि॑यान् । वि॒हर॑तीति॑ वि-हरति ।

यत् । ए॒व । य॒ज्ञस्य॑ । अपराजितमित्यपरा – जितम् । ततः॑ । ए॒व ।

ए॒नम् । पुनः॑ । त॒नु॒ते । प॒राजि॑त्येति॑ परा-जित्य॑ । इ॒व । ख॒लु । वै ।

ए॒ते । य॒न्ति॑ । ये । ब॒हि॒ष्प॒व॒मा॒नमि॑ति॑ बहिः – प॒व॒मा॒नम् । सर्प॑न्ति ।

ब॒हि॒ष्प॒व॒मा॒न इति॑ बहिः – प॒व॒मा॒ने । स्तु॑ते । 1 (50)

TS 6.3.1.2

आ॒हाग्नी॑दग्नीन् वि॑ हर॑ ब॒र्हिः॑ स्तृ॒णाहि॑ पु॒रोडा॑शा॒ꣳ अ॒लं कु॑र्विति॑

य॒ज्ञमे॒वाप॒जित्य॑ पु॒नस्त॑न्वा॒ना य॒न्त्यङ्गा॑रैर्द्वे॑ स॒वने॑ वि॑ हरति॑

श॒लाका॑भि-स्तृ॒तीय॑ꣳ स॒शुक्र॑त्वायाथो॒ सं भ॑रत्ये॒वैन॑द्विष्णि॑या वा

अ॒मुष्मि॑न् लो॒के सो॑मम॒रक्षन्॑ तेभ्योऽधि॑ सोममाऽहरन्॑ त

म॒न्ववा॑यन्तं प॒र्यवि॑शन्॒ य ए॒वं वे॑द वि॒न्दते॑- [] 2

TS 6.3.1.2 - Padam

आ॒ह । अ॒ग्नी॒दि॒त्यग्नि॑ – इ॒त् । अ॒ग्नीन् । वी॒ति॑ । ह॒र । ब॒र्हिः ।
स्तृ॒णाहि॑ । पु॒रो॒डा॒शान् । अ॒लम् । कु॒रु । इति॑ । य॒ज्ञम् । ए॒व ।
अ॒प॒जि॒त्ये॒त्यप॑-जि॒त्य । पु॒नः । त॒न्वा॒नाः । य॒न्ति॑ । अ॒ङ्गा॒रैः । द्वे इति॑ ।
स॒व॒ने इति॑ । वी॒ति॑ । ह॒रति॑ । श॒ला॒का॒भिः । तृ॒तीयम् । स॒शु॒क्र॒त्वायेति॑
स॒शु॒क्र – त्वा॒य । अथो॑ इति॑ । स॒मि॒ति॑ । भ॒रति॑ । ए॒व । ए॒नत् ।
धि॒ष्णि॒याः । वै । अ॒मुष्मिन् । लो॒के । सोम॑म् । अ॒रक्ष॑न् । तेभ्यः ।
अ॒धीति॑ । सोम॑म् । ए॒ति॑ । अ॒हर॑न् । तम् ।
अ॒न्व॒वा॒य॒न्नित्यनु॑-अ॒वा॒यन् । तम् । प॒रीति॑ । अ॒वि॒शन् । य । ए॒वम् ।
वे॒द । वि॒न्दते॑ । 2 (50)

TS 6.3.1.3

प॒रि॒वे॒ष्टारं॑ ते सोम॑पी॒थेन॑ व्या॒र्ध्यन्त॑ ते दे॒वेषु॑ सोम॑पी॒थमै॑च्छन्त॑ तान्
दे॒वा अ॒ब्रु॒वन् द्वे॒द्वे ना॒मनी॑ कु॒रु॒ध्वमथ॑ प्र वाऽऽप्स्यथ॑ न वे॒त्यग्ने॑यो
वा अथ॑ धि॒ष्णि॒यास्तस्मा॑द् द्वि॒नामा॑ ब्रा॒ह्म॒णोऽर्धु॑क॒स्तेषां॑ ये नेदि॑ष्ठं

पर्य॑वि॒शन् ते सोम॑पी॒थं प्राऽ*प्नु॑वन्नाह॒वनीय॑ आ॒ग्नी॒ध्रीयो॑ हो॒त्रीयो॑
मा॒र्जा॒लीय॑स्तस्मा॒त् तेषु॑ जु॒ह्वत्य॑तिहाय॒ वषट्॑ करोति॒ वि ह्ये॑- [] 3

TS 6.3.1.3 - Padam

परि॒वेष्टार॑मिति॒ परि॒ - वेष्टार॑म् । ते । सोम॑पी॒थेनेति॑ सोम॒ - पी॒थेन॑ ।
वीति॑ । आ॒र्ध्वन्त॑ । ते । दे॒वेषु॑ । सोम॑पी॒थमिति॑ सोम॒ - पी॒थम् ।
ऐ॒च्छन्त॑ । तान् । दे॒वाः । अ॒ब्रुवन् । द्वे द्वे॑ इति॒ द्वे-द्वे॑ । ना॒मनी॑ इति॒ ।
कुरु॑ध्वम् । अथ॑ । प्रेति॑ । वा । आ॒प्स्यथ॑ । न । वा । इति॑ ।
अ॒ग्नयः॑ । वै । अथ॑ । धि॒ष्णि॒याः । तस्मा॒त् । द्वि॒नामेति॑ द्वि॒ - ना॒मा ।
ब्रा॒ह्म॒णः । अ॒र्धुकः॑ । तेषा॑म् । ये । नेदि॑ष्ठम् ।
पर्य॑वि॒शनिति॑ परि॒ - अ॒वि॒शन् ।
ते । सोम॑पी॒थमिति॑ सोम॒ - पी॒थम् । प्रेति॑ । आ॒प्नुवन् ।
आ॒ह॒वनीय॑ इत्या॑ - ह॒वनीयः॑ । आ॒ग्नी॒ध्रीय॑ इत्या॑ग्नि॒ - इ॒ध्रीयः॑ ।
हो॒त्रीयः॑ । मा॒र्जा॒लीयः॑ । तस्मा॒त् । तेषु॑ । जु॒ह्वति॑ ।
अ॒तिहा॑येत्यति॒-हाय॑ । वषट्॑ । करोति॒ । वीति॑ । हि । 3 (50)

TS 6.3.1.4

–ते सोमपी॑थेनाऽऽ*॑र्ध्यन्त दे॒वा वै याः प्रा॒ची–राहु॑ती–रजु॑हवुर्ये
पु॒रस्ता॑दसु॒रा आ॑सन् तां॒ स्ताभिः॑ प्राणु॑दन्त याः प्र॒तीची॑र्ये प॒श्चादसु॑रा
आ॑सन् तां॒ स्ताभिः॑–रपा॑नुदन्त प्रा॒चीर॑न्या आहु॑तयो हू॒यन्ते॑
प्र॒त्यङ्॑डासी॒नो धि॑ष्णि॒यान् व्या॑घारयति प॒श्चाच्चै॑व पु॒रस्ता॑च्च यज॑मानो
भ्रातृ॑व्यान् प्र णु॑दते तस्मा॒त् परा॑चीः प्र॒जाः प्र वी॑यन्ते प्र॒तीची॑– [] 4

TS 6.3.1.4 - Padam

ए॒ते । सो॒मपी॑थेनेति सोम – पी॒थेन॑ । आ॒र्ध्यन्त॑ । दे॒वाः । वै ।
याः । प्रा॒चीः । आहु॑तीरित्या – हु॒तीः । अजु॑हवुः । ये । पु॒रस्ता॑त् ।
असु॑राः । आ॑सन् । तान् । ताभिः॑ । प्रेति॑ । अ॒नुद॑न्त । याः ।
प्र॒तीचीः॑ । ये । प॒श्चात् । असु॑राः । आ॑सन् । तान् । ताभिः॑ । अपेति॑ ।
अ॒नुद॑न्त । प्रा॒चीः । अ॒न्याः । आहु॑तय इत्या – हु॒तयः॑ । हू॒यन्ते॑ ।
प्र॒त्यङ् । आसी॑नः । धि॑ष्णि॒यान् व्या॑घारयतीति वि – आ॑घारयति ।
प॒श्चात् । च॒ । ए॒व । पु॒रस्ता॑त् । च॒ । यज॑मानः । भ्रातृ॑व्यान् । प्रेति॑ ।

नुद॒ते । तस्मा॑त् । परा॑चीः । प्र॒जा इति॑ प्र-जाः । प्रेति॑ । वी॒यन्ते॑ ।

प्र॒तीचीः॑ । 4 (50)

TS 6.3.1.5

जा॒यन्ते॑ प्रा॒णा वा ए॒ते यद्धि॑ष्णि॒या यद॑ध्व॒र्युः प्र॒त्यङ् धि॑ष्णि॒या-
न॒तिस॑र्पेत् प्रा॒णान्त् संक॑र्षेत् प्र॒मायु॑कः स्या॒न्नाभि॑र्वा ए॒षा य॒ज्ञस्य॑
यद्धो॑तो॒र्ध्वः खलु॑ वै नाभ्यै॑ प्रा॒णोऽवा॑ङ्पा॒नो यद॑ध्व॒र्युः प्र॒त्यङ्
होता॑रम॒तिस॑र्पे॒दपा॑ने प्रा॒णं द॑ध्यात् प्र॒मायु॑कः स्या॒न्नाद॑ध्व॒र्युरु॑प गा॒येद्
वाग्वी॑र्यो॒ वा अ॑ध्व॒र्यु-र्यद॑ध्व॒र्युरु॑प-गा॒येदु॑द्-गा॒त्रे- [] 5

TS 6.3.1.5 - Padam

जा॒यन्ते॑ । प्रा॒णा इति॑ प्र-अ॒नाः । वै । ए॒ते । यत् । धि॑ष्णि॒याः । यत् ।
अ॒ध्व॒र्युः । प्र॒त्यङ् । धि॑ष्णि॒यान् । अ॒तिस॑र्पे॒दित्य॑ति - स॑र्पेत् ।
प्रा॒णानि॑ति प्र - अ॒नान् । समि॑ति । क॒र्षेत् । प्र॒मायु॑क इति॑
प्र - मा॒यु॒कः । स्या॒त् । नाभिः॑ । वै । ए॒षा । य॒ज्ञस्य॑ । यत् । हो॒ता ।
ऊ॒र्ध्वः । खलु॑ । वै । नाभ्यै॑ । प्रा॒ण इति॑ प्र - अ॒नः । अ॒वाङ् ।
अ॒पा॒न इत्य॑प - अ॒नः । यत् । अ॒ध्व॒र्युः । प्र॒त्यङ् । हो॒तार॑म् ।

अ॒ति॒स॒र्पे॒दित्य॑ति – स॒र्पे॒त् । अ॒पा॒न इत्य॑प – अ॒ने । प्रा॒णमि॑ति
प्र – अ॒नम् । द॒ध्यात् । प्र॒मा॒यु॒क इति॑ प्र – मा॒यु॒कः । स्या॒त् ।
न । अ॒ध्व॒र्युः । उपे॑ति । गा॒येत् । वा॒ग्वी॒र्य इति॑ वाक् – वी॒र्यः । वै ।
अ॒ध्व॒र्युः । यत् । अ॒ध्व॒र्युः । उप॒गा॒ये॒दित्यु॑प – गा॒ये॒त् ।
उ॒द्गा॒त्र इत्यु॑त् – गा॒त्रे । 5 (50)

TS 6.3.1.6

वा॒च॒ꣳ सं प्र य॑च्छे–दु॒प॒दा॒सु॒काऽस्य॑ वा॒ख् स्या॑द्ब्र॒ह्म॒वा॒दि॒नो वद॑न्ति
ना॒सꣳस्थि॑ते सो॒मेऽध्व॑र्युः प्र॒त्यङ् ख् सदो॑ऽती॒यादथ॑ क॒था दा॑क्षि॒णानि॑
होतु॑मेति॒ यामो॑ हि स तेषां कस्मा अह॑ दे॒वा यामं॑ वा॒ऽयामं॑ वा॒ऽनु
ज्ञा॑स्यन्तीत्यु–तरे॒णाऽऽ*ग्नी॑द्धं प॒रीत्य॑ जुहोति दाक्षि॒णानि॑ न
प्रा॒णान्त्सं क॑र्षति न्यन्ये धिष्णि॒या उप्य॑न्ते () नान्ये यान् नि॒वप॑ति
तेन॑ तान् प्री॒णाति॑ यान् ननि॒वप॑ति यदनु॒दिश॑ति तेन॑ तान् ॥ 6

TS 6.3.1.6 - Padam

वा॒चम् । सम् । प्रे॑ति । य॒च्छे॒त् । उप॒दा॒सु॒केत्यु॑प–दा॒सु॒का । अ॒स्य ।
वाक् । स्या॒त् । ब्र॒ह्म॒वा॒दि॒न इति॑ ब्र॒ह्म – वा॒दि॒नः । वद॑न्ति । न ।

अस॒॑स्थि॒त इ॒त्यसं॑ – स्थि॒ते । सोमै॑ । अ॒ध्व॒र्युः । प्र॒त्यङ् । सदः॑ ।
 अ॒तीति॑ । इ॒यात् । अथ॑ । क॒था । दाक्षि॑णानि । हो॒तुम् । ए॒ति ।
 या॒मः । हि । सः । ते॒षाम् । कस्मै॑ । अ॒ह । दे॒वाः । या॒मम् । वा ।
 अ॒या॒मम् । वा । अ॒न्वि॒ति । ज्ञा॒स्य॒न्ति । इति॑ । उ॒त्त॒रे॒णे॒त्युत्- तरे॒ण ।
 आ॒ग्नी॒ध्र॒मि॒त्याग्नि॑ – इ॒ध्र॒म् । प॒रीत्ये॑ति परि – इ॒त्य । जु॒होति॑ ।
 दाक्षि॑णानि । न । प्रा॒णानि॑ति प्र – अ॒नान् । स॒मि॒ति । क॒र्ष॒ति ।
 नी॒ति । अ॒न्ये । धि॒ष्णि॒याः । उ॒प्य॒न्ते () । न । अ॒न्ये । या॒न् ।
 नि॒व॒प॒तीति॑ नि – व॒प॒ति । ते॒न । ता॒न् । प्री॒णा॒ति । या॒न् । न ।
 नि॒व॒प॒तीति॑ नि – व॒प॒ति । यत् । अ॒नु॒दि॒श॒तीत्य॑नु – दि॒श॒ति । ते॒न ।
 ता॒न् ॥ 6 (64) (स्तु॑ते – वि॒न्द॒ते – हि – वी॑यन्ते प्र॒तीची॑ – रु॒द्रा॒त्र
 – उ॒प्य॒न्ते – चतु॑र्दश च) (A1)

TS 6.3.2.1

सु॒व॒र्गाय॑ वा ए॒तानि॑ लो॒काय॑ हूयन्ते यद् वैस॑र्ज॒नानि॑ द्वाभ्यां
 गा॒र्ह॒प॒त्ये जु॒होति॑ द्वि॒पाद् यज॑मानः प्र॒ति॒ष्ठि॒त्या आ॒ग्नी॒ध्रे
 जु॒होत्य॑न्तरि॒क्ष ए॒वाऽऽ*क्र॑मत आ॒ह॒व॒नीये॑ जु॒होति॑ सु॒व॒र्गमे॒वैनं॑ लो॒कं

गमयति देवान् वै सुवर्गं लोकं यतो रक्षाऽस्य जिघाऽसन्ते
सोमै॑न राजा॑ रक्षाऽ-स्य॑प॒हत्या॑प्तु-मा॒त्मानं॑ कृ॒त्वा सु॑वर्गं लोकमा॑यन्
रक्ष॑सा-मनु॑पलाभाया ऽऽ*त्तः सोमो॑ भवत्यथ- [] 7

TS 6.3.2.1 - Padam

सु॒वर्गा॑येति सुवः - गा॒य । वै । ए॒तानि॑ । लो॒काय॑ । हू॒यन्ते॑ । यत् ।
वैस॑र्ज॒नानि॑ । द्वा॒भ्याम् । गा॒र्.ह॑पत्य इति गा॒र्.ह॑ - प॒त्ये । जु॒होति॑ ।
द्वि॒पादि॑ति द्वि - पात् । यज॑मानः । प्र॒ति॒ष्ठित्या॑ इति प्र॒ति - स्थि॑त्यै ।
आ॒ग्नी॑द्ध्र इत्या॒ग्नि-इ॒द्धे । जु॒होति॑ । अ॒न्तरि॑क्षे । ए॒व । ए॒ति ।
क्र॒मते॑ । आ॒हव॑नीय इत्या - ह॒वनी॑यै । जु॒होति॑ । सु॒वर्ग॑मिति
सुवः - गम् । ए॒व । ए॒नम् । लो॒कम् । ग॒मय॑ति । दे॒वान् । वै ।
सु॒वर्ग॑मिति सुवः - गम् । लो॒कम् । य॒तः । रक्षा॑ऽसि ।
अ॒जिघा॑ऽसन् । ते । सोमै॑न । राजा॑ । रक्षा॑ऽसि ।
अ॒प॒ह॒त्ये॒त्यप॑ - ह॒त्य । अ॒प्तुम् । आ॒त्मान॑म् । कृ॒त्वा ।
सु॒वर्ग॑मिति सुवः - गम् । लो॒कम् । आ॒यन् । रक्ष॑साम् ।

अ॒नु॒प॒ला॒भा॒ये॒त्यनु॒प – ला॒भा॒य । आ॒त्तः । सोमः ।

भ॒व॒ति । अथ । 7 (50)

TS 6.3.2.2

वै॒स॒र्ज॒ना॒नि जु॒हो॒ति र॒क्ष॒सा॒म॒प॒ह॒त्यै त्व॑ꣳ सोम॑ त॒नू॒कृ॒द्भ्य॒ इत्या॑ह
त॒नू॒कृ॒द्ध्ये॒ष द्वे॒षो॑भ्योऽन्य॑कृ॒ते॒भ्य इत्या॑हान्य॑कृ॒ता॒नि हि र॒क्षाꣳस्यु॑रु
य॒न्ताऽसि॑ व॒रूथ॑मि॒त्याहो॑रु ण॒स्कृ॒धी॒ति वा॒वैत॑दाह जुषा॒णो
अ॒प्तु॒रा॒ज्य॒स्य वे॒त्वि॒त्याहा॒प्तुमे॒व यज॑मानं कृ॒त्वा सु॒वर्गं॑ लो॒कं
ग॒म॒य॒ति र॒क्ष॒सा-म॒नु॒प॒ला॒भा॒याऽऽ* सोमं॑ द॒द॒त- [] 8

TS 6.3.2.2 - Padam

वै॒स॒र्ज॒ना॒नि । जु॒हो॒ति । र॒क्ष॒सा॒म् । अ॒प॒ह॒त्या इत्य॑प – ह॒त्यै । त्वम् ।
सो॒म । त॒नू॒कृ॒द्भ्य॒ इति॑ त॒नू॒कृ॒त् – भ्यः । इति॑ । आ॒ह । त॒नू॒कृ॒दि॒ति
त॒नू – कृ॒त् । हि । ए॒षः । द्वे॒षो॑भ्य॒ इति॑ द्वे॒षः – भ्यः । अ॒न्य॑कृ॒ते॒भ्य
इत्य॑न्य – कृ॒ते॒भ्यः । इति॑ । आ॒ह । अ॒न्य॑कृ॒ता॒नीत्य॑न्य – कृ॒ता॒नि ।
हि । र॒क्षाꣳसि॑ । उ॒रु । य॒न्ता । अ॒सि । व॒रूथ॑म् । इति॑ । आ॒ह ।
उ॒रु । नः । कृ॒धि । इति॑ । वा॒व । ए॒तत् । आ॒ह । जुषा॒णः । अ॒प्तुः ।

आज्यस्य । वे॒तु । इति । आ॒ह । अ॒प्तुम् । ए॒व । यज॑मानम् ।
कृ॒त्वा । सु॒वर्ग॑मिति सुवः – गम् । लो॒कम् । ग॒मय॑ति । रक्ष॑साम् ।
अनु॑पलाभायेत्यनुप – ला॒भाय॑ । एति । सोम॑म् । द॒दते॑ । 8 (50)

TS 6.3.2.3

आ॒ ग्राव्ण॑ आ॒ वाय॑व्या॒न्या द्रो॑णकलशमुत् पत्नी॒मा न॑यन्त्यन्वना॒सि
प्र॒ वर्त॑यन्ति याव॑दे॒वास्या॑स्ति तेन॑ सह सु॒वर्गं॑ लो॒कमे॑ति
नय॑वत्यर्चा॒ग्नी॒द्धे जु॑होति सु॒वर्गस्य॑ लो॒कस्या॑भिनी॒त्यै ग्राव्णो॑
वाय॑व्यानि द्रो॒णकल॑शमा॒ग्नी॒द्ध उप॑ वासयति वि ह्ये॒नं तैर्गृ॑ह्यते यथ्
स॒होप॑वासये॒दपु॑वायेत सौ॒म्यर्चा॑ प्र पा॒दय॑ति स्वयै – [] 9

TS 6.3.2.3 - Padam

एति । ग्राव्णः । एति । वाय॑व्यानि । एति । द्रो॒णकल॑शमिति
द्रो॒ण – कल॑शम् । उ॒दिति॑ । पत्नी॒म् । एति । न॑यन्ति । अ॒न्विति॑ ।
अना॒सि । प्रेति॑ । वर्त॑यन्ति । यावत् । ए॒व । अ॒स्य । अ॒स्ति । तेन॑ ।
स॒ह । सु॒वर्ग॑मिति सुवः – गम् । लो॒कम् । एति । नय॑वत्येति
नय॑ – व॒त्या । ऋ॒चा । आ॒ग्नी॒द्ध इ॒त्याग्नि॑ – इ॒द्धे । जु॒होति॑ ।

सु॒वर्ग॑स्येति॑ सु॒वः – ग॒स्य॑ । लो॒कस्य॑ । अ॒भिनी॑त्या इत्य॒भि-नी॒त्यै ।
ग्राव्णः॑ । वा॒यव्या॑नि । द्रो॒णक॑ल॒शमि॑ति द्रो॒ण-क॑ल॒शम् । आ॒ग्नी॑द्ध्र
इत्या॒ग्नि – इ॒द्ध्रे । उ॒पेति॑ । वा॒सय॑ति । वी॒ति । हि । ए॒नम् । तैः ।
गृ॒ह्णते॑ ॥ यत् । स॒ह । उ॒पवा॑सयेदित्यु॒प – वा॒सये॑त् । अ॒पुवा॑येत ।
सौ॒म्य । ऋ॒चा । प्रेति॑ । पा॒दय॑ति । स्वया॑ ॥ 9 (50)

TS 6.3.2.4

-वैनं॑ दे॒वत॑या प्र पा॒दय॑त्यदि॒त्याः स॒दोऽस्य॑दि॒त्याः स॒द आ सी॑देत्या॒ह
यथा॑य॒जुरे॒वैतद्-य॑ज॒मानो॒ वा ए॒तस्य॑ पु॒रा गो॑प्ता भव॒त्येष वो॑ दे॒व
स॒वितः॒ सोम॑ इत्या॒ह स॒वितृ॑प्र॒सूत ए॒वैनं॑ दे॒वता॑भ्यः सं प्र॒यच्छ॑त्येतत्
त्वञ् सोम॑ दे॒वो दे॒वानु॑पा॒गा इत्या॑ह दे॒वो ह्येष॑ सन्- [] 10

TS 6.3.2.4 - Padam

ए॒व । ए॒नम् । दे॒वत॑या । प्रेति॑ । पा॒दय॑ति । अ॒दि॒त्याः । स॒दः । अ॒सि ।
अ॒दि॒त्याः । स॒दः । ए॒ति । सी॒द । इति॑ । आ॒ह । यथा॑य॒जुरिति॑
यथा॑-य॒जुः । ए॒व । ए॒तत् । य॑ज॒मानः । वै । ए॒तस्य॑ । पु॒रा । गो॑प्ता ।
भव॑ति । ए॒षः । वः । दे॒व । स॒वितः॒ । सोमः॑ । इति॑ । आ॒ह ।

स॒वि॒तृ॒प्र॒सू॒त इति॑ स॒वि॒तृ॒-प्र॒सू॒तः । ए॒व । ए॒न॒म् । दे॒वता॑भ्यः । स॒म् ।
प्रेति॑ । य॒च्छ॒ति । ए॒तत् । त्व॒म् । सो॒म । दे॒वः । दे॒वान् । उपेति॑ ।
अ॒गाः । इति॑ । आ॒ह । दे॒वः । हि । ए॒षः । स॒न् । 10 (50)

TS 6.3.2.5

दे॒वानु॑पैती॒द॒म॒हं म॒नु॒ष्यो म॒नु॒ष्या॒नि॒त्या॒ह म॒नु॒ष्यो(१) ह्येष॑ स॒न्
म॒नु॒ष्या॒नु॒पैति॑ यदे॒तद् यजु॑र्न ब्रू॒याद॑प्र॒जा अ॒प॒शु॒र्य॒ज॒मा॒नः स्या॒त्
स॒ह प्र॒जया॑ स॒ह रा॒य॒स्पो॒षे॒णे॒त्या॒ह प्र॒जयै॑व प॒शु॒भिः स॒हे॒मं
लोक॑मु॒पा॒व॒र्त॒ते न॒मो दे॒वे॒भ्य इ॒त्या॒ह न॒म॒स्का॒रो हि दे॒वाना॑ ७
स्व॒धा पि॒तृ॒भ्य इ॒त्या॒ह स्व॒धा॒का॒रो हि- [] 11

TS 6.3.2.5 - Padam

दे॒वान् । उपैतीत्यु॑प - एति॑ । इ॒द॒म् । अ॒ह॒म् । म॒नु॒ष्यः । म॒नु॒ष्यान् ।
इति॑ । आ॒ह । म॒नु॒ष्यः । हि । ए॒षः । स॒न् । म॒नु॒ष्यान् ।
उपैतीत्यु॑प - एति॑ । यत् । ए॒तत् । यजुः॑ । न । ब्रू॒यात् ।
अ॒प्र॒जा इत्य॑प्र - जाः । अ॒प॒शुः । य॒ज॒मा॒नः । स्या॒त् । स॒ह ।
प्र॒जयेति॑ प्र - जया॑ । स॒ह । रा॒यः । पो॒षे॒ण । इति॑ । आ॒ह ।

प्र॒जये॑ति॒ प्र – जया॑ । ए॒व । प॒शुभि॑रिति॒ पशु॑-भिः । स॒ह । इ॒मम् ।
लो॒कम् । उ॒पाव॑र्तत॒ इत्यु॑प – आ॒वर्त॑ते । न॒मः । दे॒वेभ्यः॑ । इति॑ ।
आ॒ह । न॒मस्का॑र इति॑ न॒मः – का॑रः । हि । दे॒वाना॑म् ।
स्व॒धेति॑ स्व – धा । पि॒तृभ्य॑ इति॑ पि॒तृ – भ्यः॑ । इति॑ । आ॒ह ।
स्व॒धाका॑र इति॑ स्व॒धा – का॑रः । हि । 11 (50)

TS 6.3.2.6

पि॒तृणा॑मि॒दम॑हं निर्व॑रुणस्य पा॒शादि॑त्याह वरु॑णपा॒शादे॒व निर्मु॑च्यते
अ॒ग्ने॑ व्रत॑पत आ॒त्मनः॑ पूर्वा॑ तनू॒रादे॑येत्याहुः॑ को हि तद्वे॒द यद्
वसी॑यान्त् स्वे व॒शे भू॑ते पुन॑र्वा ददा॑ति न वेति॑ ग्रा॒वाणो॑ वै सोम॑स्य
राज्ञो॑ मलि॒म्लुसे॒ना य ए॒वं वि॒द्वान् ग्रा॑व्ण आ॒ग्नीद्ध्र॑ उपवा॒सय॑ति
नैनं॑ मलि॒म्लुसे॒ना वि॑न्दति () ॥ 12

TS 6.3.2.6 - Padam

पि॒तृणा॑म् । इ॒दम् । अ॒हम् । नि॒रिति॑ । वरु॑णस्य । पा॒शात् । इति॑ ।
आ॒ह । वरु॑णपा॒शादि॑ति वरु॑ण – पा॒शात् । ए॒व । नि॒रिति॑ । मु॒च्यते॑ ।
अ॒ग्ने॑ । व्रत॑पत इति॑ व्रत – प॒ते । आ॒त्मनः॑ । पूर्वा॑ । तनूः॑ ।

आ॒दे॒ये॒त्या॑ – दे॒या॑ । इति॑ । आ॒हुः॑ । कः॑ । हि॑ । तत् । वेद॑ । यत् ।
व॒सी॒या॒न् । स्वे॑ । व॒शे॑ । भू॒ते॑ । पुनः॑ । वा । ददा॑ति । न । वा । इति॑ ।
ग्रा॒वा॒णः॑ । वै । सोम॑स्य । रा॒ज्ञः॑ । म॒लि॒म्लु॒से॒ने॒ति॑ म॒लि॒म्लु॒ – से॒ना॑ ।
यः । ए॒वम् । वि॒द्वान् । ग्रा॒व्णः॑ । आ॒ग्नी॑द्ध्र इत्या॒ग्नि॑ – इ॒द्ध्रे॑ ।
उ॒प॒वा॒स॒य॒ती॒त्यु॒प॒ – वा॒स॒य॒ति॑ । न । ए॒नम् । म॒लि॒म्लु॒से॒ने॒ति॑
म॒लि॒म्लु॒ – से॒ना॑ । वि॒न्द॒ति॑ () ॥ 12 (50) (अथ॑ – द॒द॒ते॑ – स्व॒या॒ –
स॒न्ध॑ – स्व॒धा॒का॒रो॒ हि॑ – वि॒न्द॒ति॑) (A2)

TS 6.3.3.1

वै॒ष्ण॒व्य॒र्चा॑ हु॒त्वा॑ यू॒प॒म॒च्छै॑ति॒ वै॒ष्ण॒वो॒ वै॒ दे॒व॒त॒या॑ यू॒पः॑ स्व॒यै॒वैनं॑
दे॒व॒त॒या॑ ऽच्छै॒त्य॒त्य॒न्या॒नगां॑ ना॒न्या॒-नु॒पा॒गा॒मि॒त्या॒हा॒ति॑ ह्य॒न्या॒ने॒ति॑ ना॒न्या॒-
नु॒पै॒त्य॒र्वा॒क्त्वा॑ प॒रैर॑वि॒दं प॒रोऽव॑रैरि॒त्या॒हा॒र्वा॒ग॒घ्ये॒नं॑ प॒रैर्वि॑न्द॒ति॑ प॒रोऽव॑रै॒स्तं॑
त्वा॑ जु॒षे- [] 13

TS 6.3.3.1 - Padam

वै॒ष्ण॒व्या॑ । ऋ॒चा॑ । हु॒त्वा॑ । यू॒प॒म् । अ॒च्छ॑ । ए॒ति॑ । वै॒ष्ण॒वः॑ । वै ।
दे॒व॒त॒या॑ । यू॒पः॑ । स्व॒या॑ । ए॒व । ए॒नम् । दे॒व॒त॒या॑ । अ॒च्छ॑ । ए॒ति॑ ।

अ॒तीति॑ । अ॒न्यान् । अ॒गा॒म् । न । अ॒न्यान् । उ॒पेति॑ । अ॒गा॒म् । इति॑ ।
आ॒ह । अ॒तीति॑ । हि । अ॒न्यान् । ए॒ति । न । अ॒न्यान् ।
उ॒पैतीत्यु॑प-ए॒ति । अ॒र्वाक् । त्वा । प॒रैः । अ॒विद॑म् । प॒रः । अ॒वरैः ।
इति॑ । आ॒ह । अ॒र्वाक् । हि । ए॒नम् । प॒रैः । वि॒न्दति॑ । प॒रः ।
अ॒वरैः । तम् । त्वा । जु॒षे । 13 (50)

TS 6.3.3.2

वै॒ष्णा॒वं दे॒वय॑ज्याया इत्या॒ह दे॒वय॑ज्यायै ह्ये॒नं जु॒षते॑ दे॒वस्त्वा॑ स॒विता॑
म॒द॒ध्वा॒न॒त्ति॒वत्या॑ह तेज॒सै॒वैन॑-म॒न॒क्त्योष॑धे त्राय॒स्वैन॑७ स्व॒धिते॑ मै॒नः॑
हि॒॑सीरित्या॒ह वज्रो॑ वै स्व॒धितिः॑ शान्त्यै स्व॒धिते॑र्वृ॒क्षस्य॑ बिभ्यतः
प्रथ॒मेन॑ श॒कले॑न स॒ह तेजः॑ प॒रा प॑तति यः प्रथ॒मः श॒कलः॑ प॒राप॑तेत्
तम॒प्या ह॑रेथ् स॒तेज॑स- [] 14

TS 6.3.3.2 - Padam

वै॒ष्णा॒वम् । दे॒वय॑ज्याया इति॑ दे॒व - य॒ज्यायै॑ । इति॑ । आ॒ह ।
दे॒वय॑ज्याया इति॑ दे॒व-य॒ज्यायै॑ । हि । ए॒नम् । जु॒षते॑ । दे॒वः । त्वा ।
स॒विता॑ । म॒द॒ध्वा॑ । अ॒न॒क्तु॑ । इति॑ । आ॒ह । तेज॑सा । ए॒व । ए॒नम् ।

अ॒न॒क्ति॒ । ओ॒ष॒धे॒ । त्रा॒य॒स्व॒ । ए॒न॒म् । स्व॒धि॒त॒ इति॒ स्व॒-धि॒ते॒ । मा॒ ।
 ए॒न॒म् । हि॒॒सीः॒ । इति॒ । आ॒ह॒ । व॒ज्रः॒ । वै॒ । स्व॒धि॒ति॒रिति॒
 स्व॒ - धि॒तिः॒ । शान्त्यै॑ । स्व॒धि॒ते॒रिति॒ स्व॒ - धि॒तेः॒ । वृ॒क्ष॒स्य॑ ।
 बि॒भ्य॒तः॒ । प्र॒थ॒मे॒न॒ । श॒क॒ले॒न॒ । स॒ह॒ । ते॒जः॒ । पे॒रे॒ति॒ । प॒त॒ति॒ । यः॒ ।
 प्र॒थ॒मः॒ । श॒क॒लः॒ । पे॒रा॒प॒ते॒दि॒ति॒ पे॒रा॒ - पे॒ते॒त् । त॒म् । अ॒पि॒ । ए॒ति॒ ।
 ह॒रे॒त् । स॒ते॒ज॒स॒मि॒ति॒ स॒ - ते॒ज॒स॒म् । 14 (50)

TS 6.3.3.3

-मे॒वैन॒मा॒ ह॒र॒ती॒मे॒ वै॒ लो॒का॒ यू॒पा॒त् प्र॒य॒तो॒ बि॒भ्य॒ति॒ दि॒व॒म॒ग्रे॒ण॒ मा॒
 ले॒खी॒र॒न्त॒रि॒क्षं॒ म॒द्ध्ये॒न॒ मा॒ हि॒॒सी॒रि॒त्या॒है॒भ्य॒ ए॒वैनं॑ लो॒के॒भ्यः॑
 श॒म॒य॒ति॒ व॒न॒स्प॒ते॒ श॒त॒व॒ल्.शो॒ वि॒ रो॒हे॒त्या॒व्र॒श्च॒ने॒ जु॒हो॒ति॒ त॒स्मा॒-
 दा॒व्र॒श्च॒ना॒द्-वृ॒क्षा॒णां॒ भू॒या॒॒स॒ उ॒त्ति॒ष्ठ॒न्ति॒ स॒ह॒स्र॒व॒ल्.शा॒ वि॒ व॒य॒
 रु॒हे॒मे॒त्या॒हा॒- ऽऽ*शि॒ष॒मे॒वै॒ता॒मा॒ शा॒स्ते॒ ऽन॒क्ष॒स॒ङ्गं॒- [] 15

TS 6.3.3.3 - Padam

ए॒व॒ । ए॒न॒म् । ए॒ति॒ । ह॒र॒ति॒ । इ॒मे॒ । वै॒ । लो॒काः॒ । यू॒पा॒त् । प्र॒य॒त॒ इति॒
 प्र॒ - य॒तः॒ । बि॒भ्य॒ति॒ । दि॒व॒म् । अ॒ग्रे॒ण॒ । मा॒ । ले॒खीः॒ । अ॒न्त॒रि॒क्ष॒म् ।

म॒द्ध्ये॑न । मा । हि॒॒सीः । इति॑ । आ॒ह । ए॒भ्यः । ए॒व । ए॒नम् ।
लो॒के॒भ्यः । श॒म॒य॒ति । व॒न॒स्प॒ते । श॒त॒व॒ल्.श॒ इति॑ श॒त – व॒ल्.शः॑ ।
वी॒ति । रो॒ह । इति॑ । आ॒व्र॒श्च॒न इत्या॑ – व्र॒श्च॒ने । जु॒होति॑ । तस्मा॑त् ।
आ॒व्र॒श्च॒ना॒दि॒त्या – व्र॒श्च॒नात् । वृ॒क्षा॒णाम् । भू॒या॒ँसः । उ॒दि॒ति ।
ति॒ष्ठ॒न्ति । स॒ह॒स्र॒व॒ल्.शा॒ इति॑ स॒ह॒स्र – व॒ल्.शाः॑ । वी॒ति । व॒यम् ।
रु॒हे॒म । इति॑ । आ॒ह । आ॒शि॒ष॒मि॒त्या–शि॒षम् । ए॒व । ए॒ताम् । ए॒ति ।
शा॒स्ते । अ॒न॒क्ष॒स॒ङ्ग॒मि॒त्य॒न॒क्ष – स॒ङ्गम् । 15 (50)

TS 6.3.3.4

ँवृ॒श्चेद्–य॒द॒क्ष॒स॒ङ्गंँ वृ॒श्चे॒द॒ध॒र्इषंँ य॒ज॒मा॒न॒स्य॒ प्र॒मा॒यु॒क॒७ स्या॒द्यं
का॒म॒ये॒ता॒प्र॒ति॒ष्ठि॒तः स्या॒दि॒त्या॒रो॒हं तस्मै॑ वृ॒श्चे॒दे॒ष वै व॒न॒स्प॒ती॒ना–
म॒प्र॒ति॒ष्ठि॒तो॒ऽप्र॒ति॒ष्ठि॒त ए॒व भ॒व॒ति यं का॒म॒ये॒ता॒प॒शुः स्या॒दि॒त्य॒पर्णंँ तस्मै॑
शु॒ष्का॒ग्रंँ वृ॒श्चे॒दे॒ष वै व॒न॒स्प॒ती॒ना–म॒प॒श॒व्यो॒ऽप॒शु॒रे॒व भ॒व॒ति यं का॒म॒ये॒त
प॒शु॒मा॒न्थ् स्या॒दि॒ति॑ ब॒हु॒पर्णंँ तस्मै॑ ब॒हु॒शा॒खंँ वृ॒श्चे॒दे॒ष वै– [] 16

TS 6.3.3.4 - Padam

वृ॒श्चेत् । यत् । अ॒क्ष॒स॒ङ्ग॒मित्य॑क्ष – स॒ङ्ग॒म् । वृ॒श्चेत् ।
अ॒ध॒र्इ॒ष॒मित्य॑धः – इ॒ष॒म् । यज॑मानस्य । प्र॒मा॒यु॒क॒मिति॑ प्र-मा॒यु॒क॒म् ।
स्यात् । यम् । का॒मये॑त । अ॒प्र॒ति॒ष्ठित॑ इत्य॒प्रति॑ – स्था॒तः । स्यात् ।
इति॑ । आ॒रो॒ह॒मित्या॑ – रो॒ह॒म् । तस्मै॑ । वृ॒श्चेत् । ए॒षः । वै ।
व॒न॒स्प॒ती॒नाम् । अ॒प्र॒ति॒ष्ठित॑ इत्य॒प्रति॑ – स्था॒तः ।
अ॒प्र॒ति॒ष्ठित॑ इत्य॒प्रति॑ – स्था॒तः । ए॒व । भ॒व॒ति॒ । यम् । का॒मये॑त ।
अ॒प॒शुः । स्यात् । इति॑ । अ॒प॒र्ण॒म् । तस्मै॑ ।
शु॒ष्का॒ग्र॒मिति॑ शु॒ष्क – अ॒ग्र॒म् । वृ॒श्चेत् । ए॒षः । वै । व॒न॒स्प॒ती॒नाम् ।
अ॒प॒श॒व्यः । अ॒प॒शुः । ए॒व । भ॒व॒ति॒ । यम् । का॒मये॑त । प॒शु॒मा॒निति॑
प॒शु – मा॒न् । स्यात् । इति॑ । ब॒हु॒प॒र्ण॒मिति॑ ब॒हु – प॒र्ण॒म् । तस्मै॑ ।
ब॒हु॒शा॒ख॒मिति॑ ब॒हु – शा॒ख॒म् । वृ॒श्चेत् । ए॒षः । वै । 16 (50)

TS 6.3.3.5

व॒न॒स्प॒ती॒नां प॒श॒व्यः प॒शु॒मा॒ने॒व भ॑वति प्र॒ति॒ष्ठितं॑ वृ॒श्चेत्
प्र॒ति॒ष्ठा॒का॒म॒स्यै॒ष वै व॒न॒स्प॒ती॒नां प्र॒ति॒ष्ठितो॑ यः स॒मे भू॒म्यै

स्वाद्योने॑ रूढः॑ प्रत्ये॒व तिष्ठति॑ यः प्रत्यङ्ङु॑पनतस्तं वृश्चे॒त् स हि॑
मेध॑मभ्युपनतः॑ पञ्चार॑न्निं तस्मै॑ वृश्चे॒द्यं का॒मये॒तोपै॑नमुत्तरो॑ यज्ञो
नमे॑दिति॒ पञ्चाक्षरा॑ पङ्क्तिः॑ पाङ्क्तो॑ यज्ञ॑ उपै॒नमुत्तरो॑ यज्ञो- [] 17

TS 6.3.3.5 - Padam

वनस्पती॑नाम् । पश॑व्यः । पशु॑मानिति॑ पशु - मान् । ए॒व । भव॑ति ।
प्रति॑ष्ठितमिति॒ प्रति - स्थि॑तम् । वृश्चे॒त् । प्रति॑ष्ठाका॒मस्येति॑
प्रति॑ष्ठा- का॒मस्य॑ । ए॒षः । वै । वनस्पती॑नाम् । प्रति॑ष्ठित इति॒
प्रति - स्थि॑तः । यः । स॒मे । भूम्यै॑ । स्वात् । यो॒नैः । रूढः॑ ।
प्रती॑ति । ए॒व । तिष्ठति॑ । यः । प्रत्यङ्ङु॑ । उप॑नत इत्युप-नतः । तम् ।
वृश्चे॒त् । सः । हि । मेध॑म् । अ॒भीति॑ । उप॑नत इत्युप - नतः ।
पञ्चार॑न्निमिति॒ पञ्च- अ॒रन्निम् । तस्मै॑ । वृश्चे॒त् । यम् । का॒मये॒त ।
उपे॑ति । ए॒नम् । उत्तर॑ इत्युत् - तरः । य॒ज्ञः । नमे॑त् । इति॒ ।
पञ्चाक्ष॑रेति॒ पञ्च- आ॒क्षरा॑ । पङ्क्तिः॑ । पाङ्क्तः॑ । य॒ज्ञः । उपे॑ति ।
ए॒नम् । उत्तर॑ इत्युत् - तरः । य॒ज्ञः । 17 (50)

TS 6.3.3.6

नमति षडरनिं प्रतिष्ठाकामस्य षड्वा ऋतव ऋतुष्वेव प्रति तिष्ठति
सप्तारनिं पशुकामस्य सप्तपदा शक्वरी पशवः शक्वरी पशूनेवाव
रुन्धे नवारनिं तेजस्कामस्य त्रिवृता स्तोमेन सम्मितं तेजस्त्रिवृत्
तेजस्यैव भव-त्येकादशारनि-मिन्द्रियकाम-स्यैकादशाक्षरा
त्रिष्टुगिन्द्रियं त्रिष्टुगिन्द्रियाव्येव भवति पञ्चदशारनिं भ्रातृव्यवतः
पञ्चदशो वज्रो भ्रातृव्याभिभूत्यै सप्तदशारनिं प्रजाकामस्य सप्तदशः
प्रजापतिः प्रजापतेराप्त्या () एकविंशत्यरनिं प्रतिष्ठाकाम-
स्यैकविंशः स्तोमानां प्रतिष्ठा प्रतिष्ठित्या अष्टाश्रिर्भव-त्यष्टाक्षरा
गायत्री तेजो गायत्री गायत्री यज्ञमुखं तेजसैव गायत्रिया यज्ञमुखेन
संमितः ॥ 18

TS 6.3.3.6 - Padam

नमति । षडरनिमिति षट् - अरनिम् । प्रतिष्ठाकामस्येति
प्रतिष्ठा- कामस्य । षट् । वै । ऋतवः । ऋतुषु । एव । प्रतीति ।
तिष्ठति । सप्तारनिमिति सप्त - अरनिम् ।

प॒शु॒का॒म॒स्ये॒ति॒ प॒शु॒ – का॒म॒स्य॒ । स॒प्त॒प॒दे॒ति॒ स॒प्त॒–प॒दा॒ । श॒क्व॒री॒ ।

प॒श॒वः॑ । श॒क्व॒री॒ । प॒शून्॑ । ए॒व । अ॒वे॒ति॒ । रु॒न्धे॒ ।

न॒वा॒र॒न्नि॒मि॒ति॒ न॒व॒ – अ॒र॒न्नि॒म् । ते॒ज॒स्का॒म॒स्ये॒ति॒ ते॒जः॑ – का॒म॒स्य॒ ।

त्रि॒वृ॒ते॒ति॒ त्रि॒ – वृ॒ता॑ । स्तो॒मे॒न॑ । स॒म्मि॒त॒मि॒ति॒ सं – मि॒त॒म् । ते॒जः॑ ।

त्रि॒वृ॒दि॒ति॒ त्रि॒ – वृ॒त् । ते॒ज॒स्वी॒ । ए॒व । भ॒व॒ति॒ ।

ए॒का॒द॒शा॒र॒न्नि॒मि॒त्ये॒का॒द॒श॒–अ॒र॒न्नि॒म् ।

इ॒न्द्रि॒य॒का॒म॒स्ये॒ती॒न्द्रि॒य॒–का॒म॒स्य॒ । ए॒का॒द॒शा॒क्ष॒रे॒त्ये॒का॒द॒श॒ – अ॒क्ष॒रा॒ ।

त्रि॒ष्टु॒क् । इ॒न्द्रि॒य॒म् । त्रि॒ष्टु॒क् । इ॒न्द्रि॒या॒वी॒ । ए॒व । भ॒व॒ति॒ ।

प॒ञ्च॒द॒शा॒र॒न्नि॒मि॒ति॒ प॒ञ्च॒द॒श॒ – अ॒र॒न्नि॒म् । भ्रा॒तृ॒व्य॒व॒त॒ इति॒

भ्रा॒तृ॒व्य॒ – व॒तः॑ । प॒ञ्च॒द॒श॒ इति॒ प॒ञ्च॒ – द॒शः॑ । व॒ज्रः॑ ।

भ्रा॒तृ॒व्या॒भि॒भू॒त्या॒ इति॒ भ्रा॒तृ॒व्य॒ – अ॒भि॒भू॒त्यै॒ ।

स॒प्त॒द॒शा॒र॒न्नि॒मि॒ति॒ स॒प्त॒द॒श॒ – अ॒र॒न्नि॒म् ।

प्र॒जा॒का॒म॒स्ये॒ति॒ प्र॒जा॒ – का॒म॒स्य॒ । स॒प्त॒द॒श॒ इति॒ स॒प्त॒ – द॒शः॑ ।

प्र॒जा॒प॒ति॒रि॒ति॒ प्र॒जा॒–प॒तिः॑ । प्र॒जा॒प॒ते॒रि॒ति॒ प्र॒जा॒ – प॒तेः॑ । आ॒प्त्यै॑ () ।

एकविंशत्यरन्निमित्येकविंशति – अरन्निम् । प्रतिष्ठाकामस्येति
प्रतिष्ठा – कामस्य । एकविंश इत्येक – विंशः । स्तोमानाम् ।
प्रतिष्ठेति प्रति – स्था । प्रतिष्ठित्या इति प्रति – स्थित्यै ।
अष्टाश्रिरित्यष्टा – अश्रिः । भवति । अष्टाक्षरेत्यष्टा – अक्षरा ।
गायत्री । तेजः । गायत्री । गायत्री । यज्ञमुखमिति यज्ञ – मुखम् ।
तेजसा । एव । गायत्रिया । यज्ञमुखेनेति यज्ञ – मुखेन ।
संमित इति सं – मितः ॥ 18 (69)

(जुषे – सतेजस – मनक्षसङ्गं – बहुशाखं वृश्चेदेष वै – यज्ञ
उपैनमुत्तरो यज्ञ – आप्त्या – एकान्नविंशतिश्च) (A3)

TS 6.3.4.1

पृथिव्यै त्वाऽन्तरिक्षाय त्वा दिवे त्वेत्याहैभ्य एवैनं लोकेभ्यः
प्रोक्षति पराञ्चं प्रोक्षति पराडिव हि सुवर्गो लोकः क्रूरमिव वा
एतत् करोति यत् खनत्यपोऽव नयति शान्त्यै यवमतीरव नयत्यूर्ग्वै
यवो यजमानेन यूपः संमितो यावानेव यजमान-स्तावती-मेवास्मि-
न्नूर्जं दधाति- [] 19

TS 6.3.4.1 - Padam

पृ॒थि॒व्यै । त्वा । अ॒न्तरि॑क्षाय । त्वा । दि॒वे । त्वा । इति॑ । आ॒ह ।
ए॒भ्यः । ए॒व । ए॒नम् । लो॒के॒भ्यः । प्रेति॑ । उ॒क्षति॑ । परा॒ञ्चम् ।
प्रेति॑ । उ॒क्षति॑ । परा॒ङ् । इ॒व । हि । सु॒वर्ग॑ इति॑ सुवः-गः । लो॒कः ।
क्रू॒रम् । इ॒व । वै । ए॒तत् । क॒रोति॑ । यत् । ख॒नति॑ । अ॒पः । अ॒वेति॑ ।
न॒यति॑ । शान्त्यै॑ । य॒व॒म॒ती॒रिति॑ य॒व-म॒तीः । अ॒वेति॑ । न॒यति॑ । ऊ॒र्क् ।
वै । य॒वः । य॒ज॒मा॒नेन॑ । यू॒पः । सं॒मित॑ इति॑ सं – मि॒तः । या॒वा॒न् ।
ए॒व । य॒ज॒मा॒नः । ता॒व॒ती॒म् । ए॒व । अ॒स्मिन् । ऊ॒र्ज॒म् ।

द॒धा॒ति । 19 (50)

TS 6.3.4.2

पि॒तृ॒णाꣳ स॒द॒न॒म॒सीति॑ ब॒र्.हि॒र॒व॑ स्तृ॒णाति॑ पि॒तृ॒दे॒व॒त्या(१)ꣳ
ह्ये॒तद्-य॒न्नि॒खा॒तं य॒द्-ब॒र्.हि॒र॒न॒व॒स्ती॒र्य॑ मि॒नु॒यात् पि॒तृ॒दे॒व॒त्यो नि॒खा॒तः
स्याद् ब॒र्.हि॒र॒व॒स्ती॒र्य॑ मि॒नो॒त्य॒स्यामे॒वैनं॑ मि॒नोति॑ यू॒प॒श॒क॒ल॒म॒वा॒स्यति॑
स॒ते॒ज॒स॒मे॒वैनं॑ मि॒नोति॑ दे॒व॒स्त्वा स॒वि॒ता म॒द्ध्वाꣳन॒क्त्वि॒त्याह॑

तेज॑सै॒वैन॑मनक्ति सु॒पि॒प्प॒ला॒भ्य॒-स्त्वौष॑धी॒भ्य इति॑ च॒षालं॑

प्रति॑- [] 20

TS 6.3.4.2 - Padam

पित॑रुणाम् । स॒दनम् । अ॒सि॒ । इति॑ । ब॒र्हिः॑ । अ॒वेति॑ । स्तृ॒णाति॑ ।
पित॑रुदे॒वत्य॑मिति॑ पितृ॑ - दे॒वत्य॑म् । हि॑ । ए॒तत् । यत् । नि॒खात॑मिति॑
नि॑ - खा॒तम् । यत् । ब॒र्हिः॑ । अ॒न॒व॒स्तीर्ये॑त्य॒न॒व - स्तीर्य॑ ।
मि॒नुयात् । पित॑रुदे॒वत्य॑ इति॑ पितृ॑-दे॒वत्यः॑ । नि॒खात॑ इति॑ नि॒-खा॒तः ।
स्यात् । ब॒र्हिः॑ । अ॒व॒स्तीर्ये॑त्य॒व - स्तीर्य॑ । मि॒नोति॑ । अ॒स्याम् ।
ए॒व । ए॒नम् । मि॒नोति॑ । यू॒प॒श॒क॒ल॒मिति॑ यू॒प - श॒क॒लम् । अ॒वेति॑ ।
अ॒स्यति॑ । स॒तेज॑स॒मिति॑ स॒ - तेज॑सम् । ए॒व । ए॒नम् । मि॒नोति॑ ।
दे॒वः । त्वा॒ । स॒वि॒ता । म॒द॒ध्वा॑ । अ॒न॒क्तु॑ । इति॑ । आ॒ह॒ । तेज॑सा ।
ए॒व । ए॒नम् । अ॒न॒क्ति॑ । सु॒पि॒प्प॒ला॒भ्य इति॑ सु॒-पि॒प्प॒ला॒भ्यः॑ । त्वा॒ ।
ओष॑धी॒भ्य इत्योष॑धि - भ्यः॑ । इति॑ । च॒षाल॑म् । प्रतीति॑ । 20 (50)

TS 6.3.4.3

मुञ्चति॑ तस्माच्छीर्ष॑त ओष॑धयः फलं॑ गृह्णन्त्यन॑क्ति तेजो॑
वा आज्यं॑ यज॑मानेनाग्नि॒ष्ठाऽश्रिः॑ संमि॑ता यदग्नि॒ष्ठा-मश्रि॑मन॒क्ति
यज॑मानमेव तेज॑सा ऽन॒क्त्यान्त॑-मन॒क्त्यान्त॑मेव यज॑मानं तेज॑सान॒क्ति
सर्व॑तः परि॑ मृश॒त्यपरि॑वर्ग-मेवास्मिन् तेजो॑ दधा॒त्युद् दिव॑ꣳ
स्त॒भाना॑ऽन्तरि॒क्षं पृ॒णेत्या॑हैषां लो॒कानां॑ वि॒धृत्यै॑ वैष्ण॒व्यर्चा- [] 21

TS 6.3.4.3 - Padam

मुञ्चति॑ । तस्मात् । शीर्ष॑तः । ओष॑धयः । फलम् ।
गृह्णन्ति॑ । अन॒क्ति । तेजः॑ । वै । आज्यम् । यज॑मानेन ।
अग्नि॒ष्ठेत्यग्नि॑-स्था । अश्रिः॑ । संमि॑तेति सं - मि॒ता । यत् ।
अग्नि॒ष्ठामित्यग्नि॑-स्थाम् । अश्रि॑म् । अन॒क्ति । यज॑मानम् ।
एव । तेज॑सा । अन॒क्ति । आ॒न्तमित्या॑ - अ॒न्तम् । अन॒क्ति ।
आ॒न्तमित्या॑ - अ॒न्तम् । एव । यज॑मानम् । तेज॑सा । अन॒क्ति ।
सर्व॑तः । परि॑ति । मृश॒ति । अपरि॑वर्गमित्यपरि - वर्गम् । एव ।
अस्मिन् । तेजः॑ । दधा॒ति । उदि॑ति । दिवम् । स्त॒भान । एति॑ ।

अ॒न्तरि॑क्षम् । पृ॒ण । इति॑ । आ॒ह । ए॒षाम् । लो॒काना॑म् ।

वि॒धृत्या॑ इति॑ वि – धृ॒त्यै । वै॒ष्णव्या॑ । ऋ॒चा । 21 (50)

TS 6.3.4.4

कल्प॑यति वै॒ष्णवो॑ वै दे॒वत॑या यूपः॑ स्वयै॒वैनं॑ दे॒वत॑या कल्प॑यति
द्वाभ्यां॑ कल्प॑यति द्वि॒पाद् यज॑मानः॒ प्रति॑ष्ठित्यै॒ यं का॑मये॒त तेज॑सैनं
दे॒वता॑भिरिन्द्रि॒येण॑ व्य॒र्धये॑य-मि॒त्यग्नि॑ष्ठां तस्या॑श्रि-मा॒हव॑नीयादि॒त्थं
ँवे॒त्थं वा॑ऽति नाव॑येत् तेज॑सै॒वैनं॑ दे॒वता॑भिरिन्द्रि॒येण॑ व्य॒र्धय॑ति॒ यं
का॑मये॒त तेज॑सैनं दे॒वता॑भिरिन्द्रि॒येण॑ सम॒र्धये॑यमि॒त्य- [] 22

TS 6.3.4.4 - Padam

कल्प॑यति । वै॒ष्णवः॑ । वै । दे॒वत॑या । यूपः॑ । स्वया॑ । ए॒व । ए॒नम् ।
दे॒वत॑या । कल्प॑यति । द्वा॒भ्याम् । कल्प॑यति । द्वि॒पादि॑ति द्वि – पात् ।
यज॑मानः । प्रति॑ष्ठित्या इति॑ प्रति – स्थि॒त्यै । यम् । का॑मये॒त ।
तेज॑सा । ए॒नम् । दे॒वता॑भिः । इन्द्रि॒येण॑ । वी॒ति । अ॒र्धये॑यम् । इति॑ ।
अ॒ग्नि॑ष्ठा॒मि॒त्यग्नि॑ – स्था॒म् । तस्य॑ । अ॒श्रि॑म् ।
आ॒हव॑नीयादि॒त्या-ह॑वनीयात् । इ॒त्थम् । वा । इ॒त्थम् । वा । अती॑ति ।

ना॒व॒ये॒त् । ते॒ज॒सा । ए॒व । ए॒न॒म् । दे॒व॒ता॒भिः । इ॒न्द्रि॒ये॒ण । वी॒ति॒ ।
अ॒र्ध॒य॒ति॒ । य॒म् । का॒म॒ये॒त् । ते॒ज॒सा । ए॒न॒म् । दे॒व॒ता॒भिः ।
इ॒न्द्रि॒ये॒ण । स॒मि॒ति॒ । अ॒र्ध॒ये॒य॒म् । इ॒ति॒ । 22 (50)

TS 6.3.4.5

–ग्नि॒ष्ठां तस्या॑श्चि॒माह॑वनी॒येन॑ सं मि॒नुया॑त् तेज॒सैवैनं॑ दे॒व॒ता॒भिरिन्द्रि॒ये॒ण
सम॑र्ध॒यति॑ ब्र॒ह्म॒वनिं॑ त्वा क्ष॒त्र॒वनि॑मित्याह यथा॒यजु॑रे॒वैतत् परि॑
व्य॒य॒त्यूर्ग्वै र॒श॒ना यज॑मानेन॒ यूपः॑ संमि॒तो यज॑मानमे॒वोर्जा॑ सम॑र्ध॒यति॑
नाभि॑द॒घ्ने परि॑ व्य॒यति॑ नाभि॒दघ्न॑ ए॒वास्मा॑ ऊ॒र्जं दधा॑ति तस्मा॑न्नाभि॒दघ्न॑
ऊ॒र्जा भु॑ञ्जते॒ यं का॒म॒ये॒तोर्जे॑नं– [] 23

TS 6.3.4.5 - Padam

अ॒ग्नि॒ष्ठा॒मि॒त्यग्नि॑ – स्था॒म् । तस्य॑ । अ॒श्चि॒म् ।
आ॒ह॒वनी॒येनेत्या॑ – ह॒वनी॒येन॑ । स॒मि॒ति॒ । मि॒नुया॑त् । ते॒ज॒सा । ए॒व ।
ए॒न॒म् । दे॒व॒ता॒भिः । इ॒न्द्रि॒ये॒ण । स॒मि॒ति॒ । अ॒र्ध॒य॒ति॒ । ब्र॒ह्म॒वनि॑मि॒ति॒
ब्र॒ह्म – वनि॑म् । त्वा । क्ष॒त्र॒वनि॑मि॒ति॒ क्ष॒त्र–वनि॑म् । इ॒ति॒ । आ॒ह ।
यथा॑यजु॒रिति॑ यथा–य॒जुः । ए॒व । ए॒तत् । प॒रीति॑ । व्य॒यति॑ । ऊ॒र्क् ।

वै । र॒श॒ना । यज॑मानेन । यू॒पः । सं॒मित॑ इति सं-मितः ।
यज॑मानम् । ए॒व । ऊ॒र्जा । स॒मि॒ति । अ॒र्ध॒य॒ति । ना॒भि॒द॒घ्न॑ इति
ना॒भि - द॒घ्ने । प॒री॒ति । व्य॒य॒ति । ना॒भि॒द॒घ्न॑ इति ना॒भि - द॒घ्ने ।
ए॒व । अ॒स्मै । ऊ॒र्ज॑म् । द॒धा॒ति । त॒स्मात् ।
ना॒भि॒द॒घ्न॑ इति ना॒भि - द॒घ्ने । ऊ॒र्जा । भु॒ञ्ज॒ते । य॒म् । का॒म॒ये॒त ।
ऊ॒र्जा । ए॒न॒म् । 23 (50)

TS 6.3.4.6

व्य॑र्धयेय-मित्यू॒र्ध्वाँ वा॑ तस्यावा॒चीं वा॑ऽवो॒हेदू॒र्जे॒वैनं॑ व्य॑र्धयति
यदि॑ का॒म॒ये॒त व॒र्षु॒कः प॒र्जन्यः॑ स्या॒दित्य॑-वा॒चीम॒वो॒हेद् वृ॒ष्टि॒मे॒व
नि॑ यच्छति॒ यदि॑ का॒म॒ये॒ताव॒र्षु॒कः स्या॒दित्यू॒र्ध्वाँमु॒दू॒हेद् वृ॒ष्टि॒मे॒वोद्
यच्छति॑ पि॒त॒ृणां॑ नि॒खातं॑ म॒नु॒ष्या॒णामू॒र्ध्वं नि॒खा॒ता॒दा र॒श॒ना॒या
ओष॑धीनाँ र॒श॒ना वि॒श्वे॒षां- [] 24

TS 6.3.4.6 - Padam

वी॒ति । अ॒र्ध॒ये॒य॒म् । इति॑ । ऊ॒र्ध्वा॒म् । वा॑ । तस्य॑ । अ॒वा॒ची॒म् ।
वा॑ । अ॒वे॒ति । ऊ॒हे॒त् । ऊ॒र्जा । ए॒व । ए॒न॒म् । वी॒ति । अ॒र्ध॒य॒ति ।

यदि॑ । का॒मये॑त । वर्॒षुकः॑ । पर्ज॑न्यः । स्या॒त् । इति॑ । अवा॑चीम् ।
 अवे॑ति । ऊ॒हेत् । वृ॒ष्टिम् । ए॒व । नी॑ति । य॒च्छति॑ । यदि॑ । का॒मये॑त ।
 अवर॑षुकः । स्या॒त् । इति॑ । ऊ॒र्ध्वम् । उ॒दिति॑ । ऊ॒हेत् । वृ॒ष्टिम् ।
 ए॒व । उ॒दिति॑ । य॒च्छति॑ । पि॒तृणा॑म् । नि॒खात॑मिति नि – खा॒तम् ।
 म॒नुष्या॑णाम् । ऊ॒र्ध्वम् । नि॒खाता॑दिति नि – खा॒तात् । एति॑ ।
 र॒शना॑याः । ओष॑धीनाम् । र॒शना॑ । वि॒श्वेषां॑ । 24 (50)

TS 6.3.4.7

दे॒वाना॑मू॒र्ध्वं र॒शना॑या आ च॒षाला॑दिन्द्र॒स्य च॒षालं॑
 सा॒द्ध्य॑नामतिरि॒क्तं स॒ वा ए॒ष सर्व॑दे॒वत्यो॑ य॒धूपो॑ य॒धूपं॑ मि॒नोति॑
 सर्वा॑ ए॒व दे॒वताः॑ प्री॒णाति॑ य॒ज्ञेन॒ वै दे॒वाः सु॒वर्गं॑ लो॒कमा॑यन्
 तेऽम॑न्यन्त म॒नुष्या॑ नोऽन्वा॒भवि॑ष्यन्तीति ते यू॒पेन॑ योपयित्वा सु॒वर्गं॑
 लो॒कमा॑यन् तमृ॒षयो॑ यू॒पेनै॒वानु॑ प्रा॒जान॑न् तद् यू॒पस्य॑ यू॒पत्वं – [] 25

TS 6.3.4.7 - Padam

दे॒वाना॑म् । ऊ॒र्ध्वम् । र॒शना॑याः । एति॑ । च॒षाला॑त् । इन्द्र॒स्य ।
 च॒षाल॑म् । सा॒द्ध्य॑नाम् । अति॑रि॒क्तमि॑त्यति – रि॒क्तम् । सः ।

वै । ए॒षः । स॒र्वदे॒वत्य॑ इति॑ स॒र्व-दे॒वत्यः॑ । यत् । यूपः॑ । यत् ।
यूप॑म् । मि॒नोति॑ । सर्वाः॑ । ए॒व । दे॒वताः॑ । प्री॒णाति॑ । य॒ज्ञेन॑ । वै ।
दे॒वाः । सु॒वर्गमि॑ति सु॒वः-गम् । लो॒कम् । आ॒यन् । ते । अ॒मन्य॑न्त ।
मनु॑ष्याः । नः । अ॒न्वाभ॑विष्यन्तीत्यनु॑-आभ॑विष्यन्ति । इति॑ । ते ।
यूपे॑न । यो॒पयि॑त्वा । सु॒वर्गमि॑ति सु॒वः-गम् । लो॒कम् । आ॒यन् ।
तम् । ऋ॒षयः॑ । यूपे॑न । ए॒व । अनु॑ । प्रेति॑ । अ॒जान॑न् । तत् ।
यूप॑स्य । यूप॑त्वमि॒ति यूप॑- त्वम् । 25 (50)

TS 6.3.4.8

यद् यूपं॑ मि॒नोति॑ सु॒वर्गस्य॑ लो॒कस्य॑ प्र॒ज्ञात्यै॑ पु॒रस्ता॑न् मि॒नोति॑
पु॒रस्ता॑द्धि य॒ज्ञस्य॑ प्र॒ज्ञाय॑ते प्र॒ज्ञात॑ हि तद् यदति॑पन्न आ॒हु॒रिदं॑
का॒र्यमा॑सीदिति॑ सा॒द्ध्यै वै दे॒वा य॒ज्ञमत्य॑मन्यन्त॑ तान् य॒ज्ञो नास्पृ॑शत्
तान् यद् य॒ज्ञस्याति॑रिक्तमासीत् तदस्पृ॑शदति॑रिक्तं वा ए॒तद् य॒ज्ञस्य॑
यद॒ग्नाव॑ग्निं मथि॑त्वा प्र॒हरत्य॑तिरिक्तमे॒त- [] 26

TS 6.3.4.8 - Padam

यत् । यूपम् । मि॒नोति॑ । सु॒वर्ग॑स्येति॑ सुवः – ग॒स्य॑ । लो॒कस्य॑ ।
प्र॒ज्ञा॒त्या इति॑ प्र – ज्ञा॒त्यै । पु॒रस्ता॑त् । मि॒नोति॑ । पु॒रस्ता॑त् । हि ।
य॒ज्ञस्य॑ । प्र॒ज्ञाय॑त इति॑ प्र – ज्ञा॒यते॑ । अ॒प्र॒ज्ञा॒तमि॒त्यप्र॑ – ज्ञा॒तम् ।
हि । तत् । यत् । अ॒ति॒प॒न्न इत्य॑ति – प॒न्ने । आ॒हुः । इ॒दम् ।
का॒र्यम् । आ॒सीत् । इति॑ । सा॒द्द॒ध्याः । वै । दे॒वाः । य॒ज्ञम् । अ॒तीति॑ ।
अ॒म॒न्य॒न्त । तान् । य॒ज्ञः । न । अ॒स्पृ॒शत् । तान् । यत् । य॒ज्ञस्य॑ ।
अ॒ति॒रि॒क्तमि॒त्यति॑ – रि॒क्तम् । आ॒सीत् । तत् । अ॒स्पृ॒शत् ।
अ॒ति॒रि॒क्तमि॒त्यति॑ – रि॒क्तम् । वै । ए॒तत् । य॒ज्ञस्य॑ । यत् । अ॒ग्नौ ।
अ॒ग्नि॒म् । म॒थित्वा । प्र॒ह॒रतीति॑ प्र – ह॒रति॑ ।
अ॒ति॒रि॒क्तमि॒त्यति॑ – रि॒क्तम् । ए॒तत् । 26 (50)

TS 6.3.4.9

– द्यू॒पस्य॑ यदू॒र्ध्वं च॒षाला॑त् तेषां॒ तद् भा॒ग॒धेयं॑ ता॒ने॒व ते॒न प्री॑णाति
दे॒वा वै स॒स्थि॑ते सोमे॒ प्र सु॒चोऽह॑रन् प्र यूपं॑ तेऽम॒न्य॒न्त य॒ज्ञवे॑शसं
वा इ॒दं कु॑र्म इति॑ ते प्र॒स्तर॑ सु॒चां निष्क्र॑यण–मप॒श्यन्त् स्वरु॑ं

यूपस्य स॒स्थिते॑ सोमे॒ प्र प्र॑स्तर॒र् हरति॑ जुहोति॒

स्वरु॒मय॑ज्ञवेशसाय ॥ 27

TS 6.3.4.9 - Padam

यूपस्य॑ । यत् । ऊ॒र्ध्वम् । च॒षाला॑त् । तेषा॑म् । तत् । भा॒ग॒धेय॑मिति॑

भाग॑ – धेयम् । तान् । ए॒व । तेन॑ । प्री॒णाति॑ । दे॒वाः । वै ।

स॒स्थित॑ इति॒ सं-स्थि॑ते । सोमे॑ । प्रेति॑ । सु॒चः । अ॒हरन् । प्रेति॑ ।

यूप॑म् । ते । अ॒म॒न्यन्त॑ । य॒ज्ञ॒वे॒श॒स॒मि॒ति॑ य॒ज्ञ – वे॒श॒स॒म् । वै ।

इ॒दम् । कु॒र्मः । इति॑ । ते । प्र॒स्तर॑मिति॑ प्र – स्त॒रम् । सु॒चाम् ।

निष्क्र॑यणमिति॑ निः – क्र॑यणम् । अ॒प॒श्यन् । स्वरु॑म् । यूप॑स्य ।

स॒स्थित॑ इति॒ सं – स्थि॑ते । सोमे॑ । प्रेति॑ । प्र॒स्तर॑मिति॑ प्र-स्त॒रम् ।

हरति॑ । जुहोति॑ । स्वरु॑म् । अ॒य॒ज्ञ॒वे॒श॒सा॒येत्य॑य॒ज्ञ-वे॒श॒सा॒य ॥ 27 (42)

(द॒धाति॑ – प्र॒त्यृ – चा – स॒म॒र्द्ध॑येय॒मित्यू – जैनं॑ – वि॒श्वेषां॑ –

यूप॑त्व – मति॑रि॒क्तमे॒तद् – द्वि॑च॒त्वारि॑ञ्श॒च्च) (A4)

TS 6.3.5.1

सा॒द्ध्या॒ वै दे॒वा अ॒स्मिँल्लो॒क आ॒सन् नान्य॑त् किं॒ चन॑ मि॒षत्
ते॒ऽग्नि॒मेवा॒ग्नये॒ मेधा॒या ऽल॑भन्त॒ न ह्य॑न्यदा॒लंभ्य॑-मवि॒न्दन्
ततो॑ वा इ॒माः प्र॒जाः प्रा॒जाय॑न्त॒ यद॒ग्नाव॑ग्निं॒ मथि॑त्वा प्र॒हर॑ति
प्र॒जानां॑ प्र॒जन॑नाय॒ रुद्रो॑ वा ए॒ष यद॑ग्निर्यज॒मानः॑ प॒शुर्य॑त्
प॒शुमा॒लभ्या॑ग्निं मन्थे॒द् रुद्रा॑य॒ यज॑मान- [] 28

TS 6.3.5.1 - Padam

सा॒द्ध्याः । वै । दे॒वाः । अ॒स्मिन् । लो॒के । आ॒सन् । न । अ॒न्यत् ।
किम् । चन॑ । मि॒षत् । ते । अ॒ग्निम् । ए॒व । अ॒ग्नये॑ । मेधा॒य । ए॒ति ।
अ॒ल॒भन्त॑ । न । हि । अ॒न्यत् । आ॒लंभ्य॑मित्या-लंभ्यम् । अ॒वि॒न्दन् ।
ततः॑ । वै । इ॒माः । प्र॒जा इति॑ प्र - जाः । प्रेति॑ । अ॒जाय॑न्त॒ यत् ।
अ॒ग्नौ । अ॒ग्निम् । मथि॑त्वा । प्र॒हर॑तीति॒ प्र - हर॑ति । प्र॒जाना॑मिति॒
प्र - जाना॑म् । प्र॒जन॑नायेति॒ प्र-जन॑नाय । रु॒द्रः । वै । ए॒षः । यत् ।
अ॒ग्निः । यज॑मानः । प॒शुः । यत् । प॒शुम् । आ॒लभ्ये॑त्या - लभ्य॑ ।
अ॒ग्निम् । मन्थे॑त् । रु॒द्राय॑ । यज॑मानम् । 28 (50)

TS 6.3.5.2

–मपि॑ द॒द्ध्यात् प्र॒मायु॑कः स्यादथो॑ ख॒ल्वाहु॑र॒ग्निः सर्वा॑ दे॒वता॑
ह॒विरे॒तद्यत् प॒शुरि॑ति यत् प॒शुमा॒लभ्या॒ग्निं म॑न्थति ह॒व्यायै॒वाऽऽ*स॑न्नाय
सर्वा॑ दे॒वता॑ जनय॑–त्युपा॒कृत्यै॒व म॑न्थ्य–स्तन्ने॒वाऽऽ*ल॑ब्धं
ने॒वाना॑लब्ध–म॒ग्ने–ज॒नित्र॑–म॒सीत्या॑हा॒ग्नेर्हो॑त–ज्ज॒नित्रं॑ वृष॒णौ स्थ॑
इत्या॑ह वृष॒णौ– [] 29

TS 6.3.5.2 - Padam

अपी॑ति । द॒द्ध्यात् । प्र॒मायु॑क इति प्र–मायु॑कः । स्यात् । अथो॑ इति ।
ख॒लु । आ॒हुः । अ॒ग्निः । सर्वाः॑ । दे॒वताः॑ । ह॒विः । ए॒तत् । यत् ।
प॒शुः । इति॑ । यत् । प॒शुम् । आ॒लभ्ये॒त्या–ल॑भ्य । अ॒ग्निम् । म॑न्थति ।
ह॒व्याय॑ । ए॒व । आ॒सन्ना॒येत्या॑–स॒न्नाय॑ । सर्वाः॑ । दे॒वताः॑ । ज॒नय॑ति ।
उपा॒कृत्ये॒त्युप॑ – आ॒कृत्य॑ । ए॒व । म॑न्थ्यः । तत् । न । इ॒व ।
आ॒लब्ध॑मित्या – ल॒ब्धम् । न । इ॒व । आ॒लब्ध॑मित्यना – ल॒ब्धम् ।
अ॒ग्नेः । ज॒नित्र॑म् । अ॒सि । इति॑ । आ॒ह । अ॒ग्नेः । हि । ए॒तत् ।
ज॒नित्र॑म् । वृष॒णौ । स्थः॑ । इति॑ । आ॒ह । वृष॒णौ । 29 (50)

TS 6.3.5.3

ह्ये॒ता-वु॒र्व॒श्य॒स्यायु॑-र॒सी॒त्याह॑ मि॒थुन॒त्वाय॑ घृ॒तेना॒क्ते वृ॑ष॒णं
दधा॑थामि॒त्याह॑ वृ॒षण॑ ७ ह्ये॒ते दधा॑ते ये अ॒ग्निं गा॒य॒त्रं छ॒न्दोऽनु॑
प्र जा॒य॒स्वे॒त्याह॑ छ॒न्दोभि॑रे॒वैनं॑ प्र ज॒नय॑त्य॒ग्नये॑ म॒थ्यमा॑ना॒यानु॑
ब्रू॒ही॒त्याह॑ सा॒वि॒त्रीमृ॑च॒मन्वा॑ह स॒वि॒तृप्र॑सू॒त ए॒वैनं॑ म॒न्थति॑ जा॒ताया॑नु

ब्रूहि- [] 30

TS 6.3.5.3 - Padam

हि । ए॒तौ । उ॒र्व॒शी॑ । अ॒सि॒ । आ॒युः॑ । अ॒सि॒ । इति॑ । आ॒ह ।
मि॒थुन॒त्वाये॑ति मि॒थुन॑ - त्वा॒य । घृ॒तेन॑ । अ॒क्ते इति॑ । वृ॒षण॑म् ।
दधा॑थाम् । इति॑ । आ॒ह । वृ॒षण॑म् । हि । ए॒ते इति॑ । दधा॑ते इति॑ ।
ये इति॑ । अ॒ग्निम् । गा॒य॒त्रम् । छ॒न्दः॑ । अ॒नु । प्रेति॑ । जा॒य॒स्व ।
इति॑ । आ॒ह । छ॒न्दोभि॑रिति॑ छ॒न्दः॑ - भिः॑ । ए॒व । ए॒नम् । प्रेति॑ ।
ज॒नय॑ति । अ॒ग्नये॑ । म॒थ्यमा॑नाय । अ॒न्विति॑ । ब्रू॒हि । इति॑ । आ॒ह ।
सा॒वि॒त्रीम् । ऋ॒चम् । अ॒न्विति॑ । आ॒ह ।

स॒वि॒तृ॒प्र॒सू॒त इति॑ स॒वि॒तृ॒-प्र॒सू॒तः । ए॒व । ए॒न॒म् । म॒न्थ॒ति । जा॒ताय॑ ।
अ॒न्वि॒ति । ब्रू॒हि । 30 (50)

TS 6.3.5.4

प्र॒हि॒य॒मा॒णा॒या॒नु ब्रू॒ही॒त्या॒ह का॒ण्डे॑का॒ण्ड ए॒वैनं॑ क्रि॒य॒मा॒णे स॒म॒र्द्ध॒य॒ति
गा॒य॒त्रीः सर्वा॑ अ॒न्वा॒ह गा॒य॒त्र॒छ॒न्दा वा अ॒ग्निः स्वे॒नै॒वैनं॑ छ॒न्द॒सा
स॒म॒र्द्ध॒य॒त्य॒ग्निः पु॒रा भ॒व॒त्य॒ग्निं म॒थि॒त्वा प्र॑ ह॒र॒ति तौ स॒ंभ॒व॒न्तौ
य॒ज॒मा॒न॒म॒भि सं भ॒व॒तो भ॒व॒तं नः॑ स॒म॒न॒सा॒वि॒त्या॒ह शा॒न्त्यै॑ प्र॒ह॒त्य
जु॒हो॒ति जा॒तायै॑वा॒स्मा अ॒न्न॒म॒पि () द॒धा॒त्या॒ज्ये॒न जु॒हो॒त्ये॒तद्वा अ॒ग्नेः
प्रि॒यं धा॒म य॒दा॒ज्यं प्रि॒ये॒णै॒वैनं॑ धा॒म्ना स॒म॒र्द्ध॒य॒त्य॒थो ते॒ज॒सा ॥ 31

TS 6.3.5.4 - Padam

प्र॒हि॒य॒मा॒णा॒ये॒ति प्र॑ - हि॒य॒मा॒णाय॑ । अ॒न्वि॒ति । ब्रू॒हि । इति॑ । आ॒ह ।
का॒ण्डे॑का॒ण्ड इति॑ का॒ण्डे॑ - का॒ण्डे॑ । ए॒व । ए॒न॒म् । क्रि॒य॒मा॒णे ।
स॒मि॒ति । अ॒र्द्ध॒य॒ति । गा॒य॒त्रीः । सर्वाः॑ । अ॒न्वि॒ति । आ॒ह ।
गा॒य॒त्र॒छ॒न्दा इति॑ गा॒य॒त्र॒-छ॒न्दाः । वै । अ॒ग्निः । स्वे॒न । ए॒व । ए॒न॒म् ।
छ॒न्द॒सा । स॒मि॒ति । अ॒र्द्ध॒य॒ति । अ॒ग्निः । पु॒रा । भ॒व॒ति । अ॒ग्नि॒म् ।

म॒थित्वा॑ । प्रेति॑ । ह॒रति॑ । तौ । सं॒भ॒व॒न्ता॒विति॑ सं – भ॒व॒न्तौ ।
यज॑मानम् । अ॒भि । स॒मिति॑ । भ॒व॒तः । भ॒व॒तम् । नः । स॒म॒न॒सा॒विति॑
स – म॒न॒सौ । इति॑ । आ॒ह॒ । शान्त्यै॑ । प्र॒ह॒त्येति॑ प्र–ह॒त्य॑ । जु॒होति॑ ।
जा॒ताय॑ । ए॒व । अ॒स्मै । अ॒न्नम् । अ॒पीति॑ () । द॒धाति॑ । आ॒ज्ये॒न ।
जु॒होति॑ । ए॒तत् । वै । अ॒ग्नेः । प्रि॒यम् । धाम॑ । यत् । आ॒ज्यम् ।
प्रि॒येण॑ । ए॒व । ए॒नम् । धाम्ना॑ । स॒मिति॑ । अ॒र्ध॒यति॑ । अथो॒ इति॑ ।
तेज॑सा ॥ 31 (68)

(यज॑मान–मा॒ह वृष॑णौ–जा॒ताया॑नु ब्रू॒ह्या–प्य॑ –ष्टाद॑श च) (A5)

TS 6.3.6.1

इ॒षे त्वेति॑ ब॒र्हि॒रा द॒त्त इ॒च्छत॑ इ॒व ह्ये॒ष यो यज॑त उ॒पवी॑रसीत्या॒होप॑
ह्ये॒ना॒नाक॑रोत्यु॒पो दे॒वान् दै॒वीर्वि॑शः प्रा॒गु॒रित्या॑ह दै॒वीर्ह्ये॒ता वि॑शः
स॒तीर्दे॑वानु॒पय॑न्ति व॒ह्नीरु॑शिज॒ इत्या॑ह॒र्त्विजो॑ वै व॒ह्य उ॒शिज॑–
स्त॒स्मादे॒वमा॑ह बृ॒हस्प॑ते धा॒रया॑ वसू॒नीत्या॑– [] 32

TS 6.3.6.1 - Padam

इ॒षे । त्वा॒ । इति॑ । ब॒र्हिः । ए॒ति । द॒त्ते । इ॒च्छते॑ । इ॒व । हि॒ ।
ए॒षः । यः । यज॑ते । उ॒पवी॑रित्युप – वीः । अ॒सि । इति॑ । आ॒ह ।
उ॒पेति॑ । हि॒ । ए॒नान् । आ॒करो॑तीत्या – क॒रोति॑ । उ॒पो इति॑ । दे॒वान् ।
दै॒वीः । वि॒शः । प्रेति॑ । अ॒गुः । इति॑ । आ॒ह । दै॒वीः । हि॒ । ए॒ताः ।
वि॒शः । स॒तीः । दे॒वान् । उ॒पय॑न्तीत्युप – य॒न्ति । व॒ह्नीः । उ॒शिजः॑ ।
इति॑ । आ॒ह । ऋ॒त्विजः॑ । वै । व॒ह्यः । उ॒शिजः॑ । तस्मा॑त् । ए॒वम् ।
आ॒ह । बृ॒हस्प॑ते । धा॒रय॑ । वसू॑नि । इति॑ । 32 (50)

TS 6.3.6.2

–ह॒ ब्र॒ह्म वै दे॒वानां॑ बृ॒हस्प॑ति ब्र॒ह्मणै॑वास्मै प॒शून॑व रु॒न्धे ह॒व्या
ते॑ स्व॒दन्ता॑मित्याह स्व॒दय॑त्ये॒वैना॑न् दे॒व त्व॑ष्ट॒र्वसु॑ र॒ण्वेत्या॑ह त्व॒ष्टा
वै प॒शूनां॑ मि॒थुना॑ना रूप॒कृद् रूप॑मे॒व प॒शुषु॑ दधाति रे॒वती॑
र॒मध्व॑मित्याह प॒शवो॑ वै रे॒वतीः॑ प॒शूने॑वास्मै र॒मय॑ति दे॒वस्य॑ त्वा
स॒वितुः॑ प्र॒सव॑ इति॑ – [] 33

TS 6.3.6.2 - Padam

आ॒ह । ब्र॒ह्म । वै । दे॒वाना॑म् । बृ॒हस्प॑तिः । ब्र॒ह्मणा॑ । ए॒व । अ॒स्मै ।
प॒शून् । अ॒वेति॑ । रु॒न्धे । ह॒व्या । ते । स्व॒दन्ता॑म् । इति॑ । आ॒ह ।
स्व॒दय॑ति । ए॒व । ए॒नान् । दे॒व । त्व॒ष्टः । वसु॑ । र॒ण्व । इति॑ । आ॒ह ।
त्व॒ष्टा । वै । प॒शूना॑म् । मि॒थुना॑नाम् । रू॒पकृ॑दिति रू॒प – कृ॑त् ।
रू॒पम् । ए॒व । प॒शुषु॑ । द॒धाति॑ । रे॒वतीः॑ । र॒मद्ध्व॑म् । इति॑ । आ॒ह ।
प॒शवः॑ । वै । रे॒वतीः॑ । प॒शून् । ए॒व । अ॒स्मै । र॒मय॑ति । दे॒वस्य॑ ।
त्वा । स॒वितुः॑ । प्र॒सव॑ इति प्र – स॒वे । इति॑ । 33 (50)

TS 6.3.6.3

र॒शना॑मा द॒त्ते प्र॑सू॒त्या अ॒श्विनौ॑र्बा॒हुभ्या॑-मि॒त्याहा॑श्विनौ हि
दे॒वाना॑म॒ध्वर्यू॑ आ॒स्तां पू॒ष्णो ह॑स्ता॒भ्यामि॒त्याह॑ य॒त्या ऋ॒तस्य॑ त्वा
दे॒वह॑विः पा॒शेना॑ऽऽ* र॒भ इ॒त्याह॑ स॒त्यं वा॑ ऋ॒तञ् स॒त्येनै॒वैन॑मृ॒तेना॑
ऽऽ*र॒भते॑ ऽक्ष॒णया॑ परि॒ हर॑ति व॒द्ध्यञ् हि प्र॒त्यज्चं॑ प्रति मु॒ञ्चन्ति॑
व्यावृ॑त्यै ध॒र्षा मा॑नु॒षानि॑ति नि यु॒नक्ति॑ धृ॒त्या अ॒द्भ्य- [] 34

TS 6.3.6.3 - Padam

र॒श॒ना॒म् । ए॒ति॑ । द॒त्ते॑ । प्र॒सू॒त्या इति॑ प्र – सू॒त्यै॑ । अ॒श्वि॒नोः॑ ।
बा॒हु॒भ्या॒मिति॑ बा॒हु-भ्या॒म् । इति॑ । आ॒ह । अ॒श्वि॒नौ॑ । हि॑ । दे॒वा॒ना॒म् ।
अ॒ध्व॒र्यू इति॑ । आ॒स्ता॒म् । पू॒ष्णः॑ । ह॒स्ता॒भ्या॒म् । इति॑ । आ॒ह ।
य॒त्यै॑ । ऋ॒त॒स्य॑ । त्वा । दे॒व॒ह॒वि॒रिति॑ दे॒व – ह॒विः॑ । पा॒शेन॑ । ए॒ति॑ ।
र॒भे॑ । इति॑ । आ॒ह । स॒त्य॒म् । वै । ऋ॒त॒म् । स॒त्येन॑ । ए॒व । ए॒न॒म् ।
ऋ॒तेन॑ । ए॒ति॑ । र॒भ॒ते॑ । अ॒क्ष॒ण॒या । प॒रीति॑ । ह॒रति॑ । व॒द्ध्य॒म् । हि॑ ।
प्र॒त्य॒ञ्च॒म् । प्र॒ति॒मु॒ञ्च॒न्तीति॑ प्र॒ति – मु॒ञ्च॒न्ति॑ । व्या॒वृ॒त्या इति॑
वि – आ॒वृ॒त्यै॑ । ध॒र्ष॑ । मा॒नु॒षान् । इति॑ । नी॒ति॑ । यु॒नक्ति॑ । धृ॒त्यै॑ ।
अ॒ध्व॒ इत्य॑त् – भ्यः॑ । 34 (50)

TS 6.3.6.4

स्त्वौष॑धी॒भ्यः॑ प्रो॒क्षामी॒त्याहा॒ध्वो ह्येष॑ ओष॑धी॒भ्यः॑ सं॒भव॑ति
यत् प॒शु॒रपां॑ पे॒रुर॒सीत्या॑हैष ह्य॒पां पा॒ता यो मे॒धायाऽऽ* र॒भ्यते॑
स्वा॒त्तं चि॒त् सदे॒व ह॒व्यमा॑पो दे॒वीः स्व॑द॒तैन॑मित्या॒ह
स्व॑द॒यत्ये॒वैन॑-मु॒परि॑ष्ठात् प्रो॒क्षत्यु॒परि॑ष्ठादे॒वैनं॑ मे॒द्ध्यं॑ करोति

पा॒यय॑त्यन्तर॑त ए॒वैनं॑ () मे॒द्ध्यं॑ करोत्य॒धस्ता॑दु॒पोक्ष॑ति सर्व॑त
ए॒वैनं॑ मे॒द्ध्यं॑ करोति ॥ 35

TS 6.3.6.4 - Padam

त्वा । ओष॑धी॒भ्य इ॒त्योष॑धि – भ्यः । प्रेति॑ । उ॒क्षामि॑ । इति॑ । आ॒ह ।
अ॒द्भ्य इ॒त्यत् – भ्यः । हि । ए॒षः । ओष॑धी॒भ्य इ॒त्योष॑धि – भ्यः ।
सं॒भव॑तीति॑ सं – भव॑ति । यत् । प॒शुः । अ॒पाम् । पे॒रुः । अ॒सि ।
इति॑ । आ॒ह । ए॒षः । हि । अ॒पाम् । पा॒ता । यः । मे॒धाय॑ । आ॒रभ्य॑त
इ॒त्या॑-र॒भ्यते॑ । स्वा॒त्तम् । चि॒त् । स॒दे॒वमि॑ति स – दे॒वम् । ह॒व्यम् ।
आपः॑ । दे॒वीः । स्व॒दत् । ए॒नम् । इति॑ । आ॒ह । स्व॒दय॑ति । ए॒व ।
ए॒नम् । उ॒परि॑ष्ठात् । प्रेति॑ । उ॒क्षति॑ । उ॒परि॑ष्ठात् । ए॒व । ए॒नम् ।
मे॒द्ध्यम् । करो॑ति । पा॒यय॑ति । अ॒न्तर॑तः । ए॒व । ए॒नम् () ।
मे॒द्ध्यम् । करो॑ति । अ॒धस्ता॑त् । उपेति॑ । उ॒क्षति॑ । सर्व॑तः ।
ए॒व । ए॒नम् । मे॒द्ध्यम् । करो॑ति ॥ 35 (60)

(व॒सूनी॑ति-प्र॒सव॑ इ॒त्य-द्भ्यो॑-ऽन्तर॑त ए॒वैनं॑ – द॒श च॑) (A6)

TS 6.3.7.1

अ॒ग्नि॒ना॒ वै॒ हो॒त्रा॒ दे॒वा॒ अ॒सु॒रा॒-न॒भ्य॑भ॒व॒-न्न॒ग्नये॑ स॒मिद्ध्य॑मा॒नाया॑नु
ब्रू॒ही॒त्या॒ह॒ भ्रा॒तृ॒व्या॒भि॒भू॒त्यै॑ स॒प्त॒द॒श॒ सा॒मि॒धे॒नी॒र॒न्वा॒ह॒ स॒प्त॒द॒शः॑
प्र॒जा॒प॒तिः॑ प्र॒जा॒प॒ते॒रा॒प्त्यै॑ स॒प्त॒द॒शान्वा॑ह॒ द्वा॒द॒श॒ मा॒साः॑ पञ्च॒र्त॒वः॑
स सँ॒व॒त्स॒रः॑ सँ॒व॒त्स॒रं॑ प्र॒जा॒ अनु॑ प्र॒जाय॑न्ते प्र॒जा॒नां॑ प्र॒ज॒न॒नाय॑
दे॒वा॒ वै॒ सा॒मि॒धे॒नी॒र॒नू॒च्य॑ य॒ज्ञं॑ ना॒न्व॒प॒श्य॒न्थ् स॑
प्र॒जा॒प॒ति॒-स्तू॒ष्णी॒मा॒घा॒र- [] 36

TS 6.3.7.1 - Padam

अ॒ग्नि॒ना॑ । वै । हो॒त्रा॑ । दे॒वाः । अ॒सु॒रा॒न् । अ॒भी॒ति॑ । अ॒भ॒व॒न् ।
अ॒ग्नये॑ । स॒मिद्ध्य॑मा॒नाये॑ति सं - इ॒द्ध्य॑मा॒नाय॑ । अ॒न्वि॒ति॑ । ब्रू॒हि॑ ।
इति॑ । आ॒ह॒ । भ्रा॒तृ॒व्या॒भि॒भू॒त्या॒ इति॑ भ्रा॒तृ॒व्य-अ॒भि॒भू॒त्यै॑ । स॒प्त॒द॒शे॑ति
स॒प्त - द॒श॒ । सा॒मि॒धे॒नी॒रिति॑ सां - इ॒धे॒नीः॑ । अ॒न्वि॒ति॑ । आ॒ह॒ ।
स॒प्त॒द॒श॒ इति॑ स॒प्त - द॒शः॑ । प्र॒जा॒प॒ति॒रिति॑ प्र॒जा - प॒तिः॑ ।
प्र॒जा॒प॒ते॒रिति॑ प्र॒जा - प॒तेः॑ । आ॒प्त्यै॑ । स॒प्त॒द॒शे॑ति स॒प्त - द॒श॒ ।
अ॒न्वि॒ति॑ । आ॒ह॒ । द्वा॒द॒श॒ । मा॒साः॑ । पञ्च॑ । ऋ॒त॒वः॑ । सः॑ ।

सँव॒थ्स॒र इति॑ सं – व॒थ्स॒रः । सँव॒थ्स॒रमि॑ति सं – व॒थ्स॒रम् । प्र॒जा
इति॑ प्र – जाः । अनु॑ । प्रेति॑ । जा॒यन्ते॑ । प्र॒जा॒नामि॑ति प्र-जा॒नाम् ।
प्र॒ज॒न॒नाये॑ति प्र-ज॒न॒नाय॑ । दे॒वाः । वै । सा॒मि॒धे॒नीरि॑ति सां-इ॒धे॒नीः ।
अ॒नू॒च्ये॒त्यनु॑ – उ॒च्य॑ । य॒ज्ञम् । न । अ॒न्वि॑ति । अ॒प॒श्य॒न् । सः ।
प्र॒जा॒प॒तिरि॑ति प्र॒जा-प॒तिः । तू॒ष्णी॑म् । आ॒घा॒रमि॑त्या-घा॒रम् । 36 (50)

TS 6.3.7.2

-मा ऽघा॒रय॑त् ततो॑ वै दे॒वा य॒ज्ञम॑न्वप॒श्यन् । यत् तू॒ष्णी-मा॒घा॒र-
मा॒घा॒रय॑ति य॒ज्ञस्या॑नु॒ख्या॒त्या अ॒सुरे॑षु वै य॒ज्ञ आ॑सीत् तं
दे॒वास्तू॒ष्णीं॑ हो॒मेना॑वृ॒ञ्ज॒त यत् तू॒ष्णी-मा॒घा॒र-मा॒घा॒रय॑ति भ्रा॒तृ॒व्यस्यै॑
व तद् य॒ज्ञं वृ॑ङ्क्ते परि॒धी॒न्त्सं मा॒र्ष्टि पु॒ना॒त्ये॒वैनान्॑ त्रि॒स्त्रिः॑ सं मा॒र्ष्टि
न्या॒वृ॒द्धि य॒ज्ञोऽथो॑ रक्ष॒साम॑प॒हत्यै॑ द्वा॒द॒श सं प॑द्यन्ते

द्वा॒द॒श- [] 37

TS 6.3.7.2 - Padam

एति॑ । अ॒घा॒रय॑त् । ततो॑ । वै । दे॒वाः । य॒ज्ञम् । अ॒न्वि॑ति । अ॒प॒श्य॒न् ।
यत् । तू॒ष्णी॑म् । आ॒घा॒रमि॑त्या - घा॒रम् । आ॒घा॒रय॑तीत्या - घा॒रय॑ति ।

य॒ज्ञस्य॑ । अनु॒ख्यात्या॑ इत्यनु॑ – ख्या॒त्यै । असु॑रेषु । वै । य॒ज्ञः ।
 आ॒सीत् । तम् । दे॒वाः । तू॒ष्णी॒हो॒मेनेति॑ तू॒ष्णीम्-हो॒मेन॑ । अ॒वृ॒ज्जत॑ ।
 यत् । तू॒ष्णीम् । आ॒घार॑मित्या॑ – घा॒रम् । आ॒घार॑यतीत्या॑ – घा॒रय॑ति ।
 भ्रातृ॑व्यस्य । ए॒व । तत् । य॒ज्ञम् । वृ॒द्धे । परि॒धीनि॑ति परि – धीन् ।
 समि॑ति । मा॒ष्टि । पु॒नाति॑ । ए॒व । ए॒नान् । त्रि॒स्त्रिरि॑ति त्रिः – त्रिः ।
 समि॑ति । मा॒ष्टि । त्र्या॑वृदि॒ति त्रि – आ॒वृत् । हि । य॒ज्ञः । अथो॑ इति॑ ।
 रक्ष॑साम् । अप॒हत्या॑ इत्यप॑ – ह॒त्यै । द्वा॒दश॑ । समि॑ति । प॒द्यन्ते॑ ।
 द्वा॒दश॑ । 37 (50)

TS 6.3.7.3

मा॒साः सँ॒वथ्स॑रः सँ॒वथ्स॑रमे॒व प्री॑णा॒त्यथो॑ सँ॒वथ्स॑रमे॒वास्मा॑
 उप॑ दधाति सु॒वर्ग॑स्य लो॒कस्य॑ सम॒ष्ट्यै शि॒रो वा ए॒तद् य॒ज्ञस्य॑
 यदा॑घा॒रोऽग्निः॑ सर्वा॑ दे॒वता॑ यदा॑घा॒र-मा॑घा॒रय॑ति शी॒र्षत॑ ए॒व य॒ज्ञस्य॑
 यज॑मानः सर्वा॑ दे॒वता॑ अव॑ रुन्धे शि॒रो वा ए॒तद् य॒ज्ञस्य॑ यदा॑घा॒र
 आ॒त्मा प॒शुरा॑घा॒रमा॑घार्य॑ प॒शुं सम॑न॒क्त्या॑त्म॒न्नेव॑ य॒ज्ञस्य॑- [] 38

TS 6.3.7.3 - Padam

मा॒साः । सँ॒व॒त्स॒र इति॑ सं-व॒त्स॒रः । सँ॒व॒त्स॒रमि॑ति सं-व॒त्स॒रम् ।
ए॒व । प्री॒णा॒ति । अथो॑ इति॑ । सँ॒व॒त्स॒रमि॑ति सं - व॒त्स॒रम् । ए॒व ।
अ॒स्मै । उ॒पेति॑ । द॒धा॒ति । सु॒व॒र्ग॒स्येति॑ सु॒वः - ग॒स्य॑ । लो॒क॒स्य॑ ।
स॒म॒ष्ट्या इति॑ सं - अ॒ष्ट्यै । शि॒रः । वै । ए॒तत् । य॒ज्ञ॒स्य॑ । यत् ।
आ॒घा॒र इत्या॑ - घा॒रः । अ॒ग्निः । सर्वाः॑ । दे॒वताः॑ । यत् ।
आ॒घा॒रमि॑त्या-घा॒रम् । आ॒घा॒रय॑तीत्या-घा॒रय॑ति । शी॒र्ष॒तः । ए॒व ।
य॒ज्ञ॒स्य॑ । य॒ज॒मा॒नः । सर्वाः॑ । दे॒वताः॑ । अ॒वेति॑ । रु॒न्धे । शि॒रः । वै ।
ए॒तत् । य॒ज्ञ॒स्य॑ । यत् । आ॒घा॒र इत्या॑ - घा॒रः । आ॒त्मा । प॒शुः ।
आ॒घा॒रमि॑त्या - घा॒रम् । आ॒घा॒र्ये॒त्या - घा॒र्य॑ । प॒शुम् । स॒मि॑ति ।
अ॒न॒क्ति॑ । आ॒त्म॒न् । ए॒व । य॒ज्ञ॒स्य॑ । 38 (50)

TS 6.3.7.4

शि॒रः प्र॒ति द॒धा॒ति सं ते॑ प्रा॒णो वा॒युना॑ ग॒च्छ॒तामि॑त्याह वा॒युदे॒व॒त्यो वै
प्रा॒णो वा॒यावे॒वा॒स्य॑ प्रा॒णं जु॒होति॑ सं य॒ज्ञ॒त्रैर॒ङ्गानि॑ सं
य॒ज्ञ॒प॒तिरा॒शिषे॑त्याह य॒ज्ञ॒प॒तिमे॒वा॒स्याऽऽशि॑षं ग॒मय॑ति वि॒श्वरू॑पो

वै त्वाष्ट्र॑ उप॒रि॒ष्टात् प॒शुम॑भ्यवमीत् तस्मा॑-दुप॒रि॒ष्टात् प॒शोर्ना॑व द्यन्ति॒
यदुप॒रि॒ष्टात् प॒शुं॑ सम॒नक्ति॒ मेद्ध्य॑मेवै- [] 39

TS 6.3.7.4 - Padam

शिरः॑ । प्र॒तीति॑ । द॒धाति॑ । स॒मिति॑ । ते । प्रा॒ण इति॑ प्र - अ॒नः ।
वा॒युना॑ ॥ ग॒च्छता॑म् । इति॑ । आ॒ह । वा॒युदे॒वत्य॑ इति॑ वा॒यु-दे॒वत्यः॑ ।
वै । प्रा॒ण इति॑ प्र - अ॒नः । वा॒यौ । ए॒व । अ॒स्य । प्रा॒णमि॑ति
प्र - अ॒नम् । जु॒होति॑ । स॒मिति॑ । य॒जत्रैः॑ । अ॒ङ्गानि॑ । स॒मिति॑ ।
य॒ज्ञप॑तिरिति॑ य॒ज्ञ - प॒तिः । आ॒शिषे॑त्या ॥ शि॒षा ॥ इति॑ । आ॒ह ।
य॒ज्ञप॑तिमिति॑ य॒ज्ञ - प॒तिम् । ए॒व । अ॒स्य । आ॒शिष॑मित्या ॥ शि॒षम् ।
ग॒मय॑ति । वि॒श्वरू॑प इति॑ वि॒श्व - रू॒पः । वै । त्वाष्ट्रः॑ ।
उप॒रि॒ष्टात् । प॒शुम् । अ॒भीति॑ । अ॒वमी॑त् । तस्मा॑त् । उप॒रि॒ष्टात् ।
प॒शोः । न । अ॒वेति॑ । द्यन्ति॑ । यत् । उप॒रि॒ष्टात् । प॒शुम् ।
स॒मन॑क्तीति॑ सं - अ॒नक्ति॑ । मेद्ध्य॑म् । ए॒व । 39 (50)

TS 6.3.7.5

नं॑ करो॒त्यृ॒त्विजो॑ वृ॒णीते॑ छन्दा॒स्येव॑ वृ॒णीते॑ सप्त॒ वृ॒णीते॑ सप्त
ग्राम्याः॑ प॒शवः॑ सप्ताऽऽ*र॒ण्याः॑ सप्त॒ छन्दा॒स्युभय॑स्या वरु॒द्ध्य॒
एका॑दश प्रया॒जान्॑ यजति॒ दश॒ वै प॒शोः॑ प्रा॒णा आ॒त्मैका॑दशो
यावा॑नेव प॒शुस्तं॑ प्र यजति॒ वपा॑मेकः॒ परि॑ शय आ॒त्मैवाऽऽ*त्मानं॑
परि॑ शये वज्रो॒ वै स्व॑धि॒तिर्वज्रो॑ यू॒पश॑क॒लो घृ॒तं खलु॑ वै ()
दे॒वा वज्रं॑ कृ॒त्वा सोम॑म॒घ्नन् घृ॒तेना॒क्तौ प॒शुं त्रा॑येथा॒मित्या॑ह
वज्रो॑णै॒वैनं॑ व॒शे कृ॒त्वाऽऽल॑भते ॥ 40

TS 6.3.7.5 - Padam

ए॒नम् । क॒रोति॑ । ऋ॒त्विजः॑ । वृ॒णीते॑ । छन्दा॒सि । ए॒व । वृ॒णीते॑ ।
सप्त॑ । वृ॒णीते॑ । सप्त॑ । ग्राम्याः॑ । प॒शवः॑ । सप्त॑ । आ॒रण्याः॑ ।
सप्त॑ । छन्दा॒सि । उ॒भय॑स्य । अ॒वरु॑द्ध्य॒ इत्य॑व – रु॒द्ध्यै ।
एका॑दश । प्र॒या॒जानि॑ति प्र – या॒जान् । यज॑ति । दश॑ । वै । प॒शोः॑ ।
प्रा॒णा इति॑ प्र–अ॒नाः । आ॒त्मा । ए॒का॒दशः॑ । यावा॑न् । ए॒व । प॒शुः ।
तम् । प्रेति॑ । यज॑ति । वपा॑म् । ए॒कः । परी॑ति । शये॑ । आ॒त्मा ।

ए॒व । आ॒त्मा॒न॒म् । प॒री॒ति॒ । श॒ये॒ । व॒ज्रः॑ । वै । स्व॒धि॒ति॒रि॒ति॒
स्व – धि॒तिः॑ । व॒ज्रः॑ । यू॒प॒श॒क॒ल इति॑ यू॒प – श॒क॒लः॑ ।
घृ॒त॒म् । ख॒लु॑ । वै () । दे॒वाः॑ । व॒ज्र॒म् । कृ॒त्वा । सो॒म॒म् ।
अ॒घ्न॒न् । घृ॒ते॒न॑ । अ॒क्तौ॑ । प॒शु॒म् । त्रा॒ये॒था॒म् । इति॑ । आ॒ह॒ ।
व॒ज्रे॒ण॑ । ए॒व । ए॒न॒म् । व॒शौ॑ । कृ॒त्वा । ए॒ति॑ । ल॒भ॒ते ॥ 40 (68)

(आ॒धा॒रं – प॒द्य॒न्ते॑ द्वा॒द॒शा – ऽ॒त्म॒न्ने॒व य॒ज्ञ॒स्य॑ – मे॒ध्य॒मे॒व –
ख॒लु॑ वा – अ॒ष्टा॒द॒श च) (A7)

TS 6.3.8.1

पर्य॑ग्नि॒ करो॒ति॒ सर्व॑हु॒तमे॒वैनं॑ करो॒त्य-स्क॑न्दा॒या-स्क॑न्नं॒ ॐ॒ हि
तद् यद् धु॒तस्य॑ स्क॒न्दति॑ त्रिः पर्य॑ग्नि॒ करो॒ति॒ त्र्या॑वृ॒द्धि॒ य॒ज्ञोऽथो॑
रक्ष॑सा॒मप॑हत्यै ब्रह्म॒वादि॑नो वदन्त्यन्वा॒रभ्यः॑ प॒शू(३)र्ना॒न्वा॒रभ्या॑(३)
इति॑ मृ॒त्यवे॒ वा ए॒ष नी॑यते॒ यत् प॒शुस्तं॑ यदन्वा॒रभेत॑ प्र॒मायु॑को
यज॑मानः स्यादथो ख॒ल्वाहुः॑ सुव॒र्गाय॑ वा ए॒ष लो॒काय॑
नी॒यते॒ यत्- [] 41

TS 6.3.8.1 - Padam

पर्य॑ग्नीति॑ परि॑ – अ॒ग्नि॑ । क॒रोति॑ । स॒र्वहु॑तमि॒ति स॒र्व-हु॑तम् । ए॒व ।
ए॒नम् । क॒रोति॑ । अ॒स्कन्दा॑य । अ॒स्कन्न॑म् । हि॑ । तत् । यत् ।
हु॒तस्य॑ । स्क्व॑न्दति । त्रिः । पर्य॑ग्नीति॑ परि॑ – अ॒ग्नि॑ । क॒रोति॑ ।
त्र्या॑वृदि॒ति त्रि॑ – आ॒वृत् । हि॑ । य॒ज्ञः । अथो॑ इति॑ । र॒क्षसाम् ।
अ॒पह॑त्या इत्य॑प – ह॒त्यै । ब्र॒ह्मवा॑दि॒न इति॑ ब्र॒ह्म-वा॑दि॒नः । व॒दन्ति॑ ।
अ॒न्वार॑भ्य इत्य॑नु – आ॒रभ्यः॑ । प॒शू(३)ः । न । अ॒न्वार॑भ्या(३)
इत्य॑नु – आ॒रभ्या(३)ः । इति॑ । मृ॒त्यवे॑ । वै । ए॒षः । नी॒यते॑ । यत् ।
प॒शुः । तम् । यत् । अ॒न्वार॑भेतेत्य॑नु-आ॒रभेत॑ । प्र॒मायु॑क
इति॑ प्र-मा॒यु॒कः । य॒ज॒मा॒नः । स्या॒त् । अथो॑ इति॑ । ख॒लु । आ॒हुः ।
सु॒वर्गा॑येति॑ सु॒वः – गा॒य । वै । ए॒षः । लो॒काय॑ । नी॒यते॑ ।

यत् । 41 (50)

TS 6.3.8.2

प॒शुरि॑ति॒ यन्ना॑न्वार॒भेत॑ सु॒वर्गा॑ल्लो॒काद् य॒ज॒मा॒नो ही॑येत
व॒पाश्र॑पणी॒भ्या-म॑न्वार॒भते॑ तन्ने॒वान्वा॑रब्धं॒ नेवा॑नन्वार॒ब्धमु॑प

प्रेष्य॑ होत॑र्ह॒व्या दे॒वेभ्य॑ इ॒त्याहे॒षित॑र्हि क॒र्म क्रि॒यते रे॒वती॑र्य॒ज्ञप॑तिं
प्रि॒य॒धा ऽऽवि॑शते॒त्याह॑ यथा॒यजु॑रे॒वैत॑द॒ग्निना॑ पु॒रस्ता॑देति॒ रक्ष॑साम॒पह॑त्यै
पृ॒थि॒व्याः संपृ॑चः पा॒हीति॑ ब॒र्हि- [] 42

TS 6.3.8.2 - Padam

प॒शुः । इति॑ । यत् । न । अ॒न्वार॑भेते॒त्यनु॑ – आ॒रभे॑त ।
सु॒व॒र्गादि॑ति सु॒वः – गा॒त् । लो॒कात् । यज॑मानः । ही॒येत॑ ।
व॒पाश्र॑पणी॒भ्यामि॑ति व॒पा – श्र॑पणी॒भ्याम् ।
अ॒न्वार॑भत॒ इत्यनु॑ – आ॒रभ॑ते । तत् । न । इ॒व ।
अ॒न्वार॑ब्धमि॒त्यनु॑-आ॒रब्ध॑म् । न । इ॒व ।
अ॒न॒न्वार॑ब्धमि॒त्यननु॑-आ॒रब्ध॑म् । उप॑ । प्रेति॑ । इ॒ष्य । हो॒तः । ह॒व्या ।
दे॒वेभ्यः॑ । इति॑ । आ॒ह । इ॒षित॑म् । हि । क॒र्म । क्रि॒यते॑ । रे॒वतीः॑ ।
य॒ज्ञप॑तिमि॒ति य॒ज्ञ – प॒तिम् । प्रि॒य॒धेति॑ प्रि॒य – धा॑ । एति॑ । वि॒शत॑ ।
इति॑ । आ॒ह । यथा॒यजु॑रिति॒ यथा॑ – य॒जुः । ए॒व । ए॒तत् । अ॒ग्निना॑ ।
पु॒रस्ता॑त् । एति॑ । रक्ष॑साम् । अ॒पह॑त्या इ॒त्यप॑ – ह॒त्यै । पृ॒थि॒व्याः ।
संपृ॑च इति॑ सं – पृ॒चः । पा॒हि । इति॑ । ब॒र्हिः । 42 (50)

TS 6.3.8.3

—रूपा॑स्यत्य—स्क॑न्दाया—स्क॑न्नं॒ हि तद् यद् बर्हि॑षि स्क॑न्दत्यथो॑
बर्हि॑षदमे॒वैनं॑ करोति परा॒डा वर्त॑तेऽध्व॒र्युः प॒शोः सं॒ज्ञप्य॑मानात्
प॒शुभ्य॑ ए॒व तन्नि॑ हु॒त आ॒त्मनो॑ऽना॒व्रस्काय॑ गच्छति श्रियं॑ प्र
प॒शूना॑प्नोति य ए॒वं वेद॑ प॒श्चाल्लो॑का वा ए॒षा प्राच्यु॑दानीयते यत् प॒त्नी
नम॑स्त आ॒ताने॑त्याहाऽऽ*दि॒त्यस्य॑ वै रश्मय— [] 43

TS 6.3.8.3 - Padam

उपेति॑ । अ॒स्यति॑ । अ॒स्क॑न्दाय । अ॒स्क॑न्नम् । हि । तत् । यत् ।
बर्हि॑षि । स्क॑न्दति । अथो॒ इति॑ । बर्हि॑षदमि॒ति बर्हि॑ — सद॑म् ।
ए॒व । ए॒नम् । क॒रोति॑ । प॒राङ् । ए॒ति । वर्त॑ते । अ॒ध्व॒र्युः । प॒शोः ।
सं॒ज्ञप्य॑मा॒नादि॑ति सं — ज्ञप्य॑मा॒नात् । प॒शुभ्य॑ इति प॒शु — भ्यः ।
ए॒व । तत् । नी॒ति । हु॒ते । आ॒त्मनः॑ । अ॒ना॒व्रस्का॑येत्य॒ना—व्र॑स्काय ।
गच्छ॑ति । श्रि॒यम् । प्रेति॑ । प॒शून् । आ॒प्नोति॑ । यः । ए॒वम् । वेद॑ ।
प॒श्चाल्लो॑केति प॒श्चात् — लो॒का । वै । ए॒षा । प्राची॑ ।
उ॒दानी॑यत इत्युत् — आ॒नीय॑ते । यत् । प॒त्नी । नमः॑ । ते ।

आ॒ता॒ने॒त्या॑ – ता॒न । इति॑ । आ॒ह । आ॒दि॒त्य॒स्य॑ । वै ।

रश्म॑यः । 43 (50)

TS 6.3.8.4

आ॒ता॒ना॒स्ते॒भ्य॑ ए॒व न॑म॒स्करो॑त्य॒न॒र्वा प्रे॑ही॒त्या॒ह भ्रा॑तृ॒व्यो वा अ॒र्वा
भ्रा॑तृ॒व्याप॑नु॒त्यै घृ॑त॒स्य कु॒ल्याम॑नु॒ सह प्र॑जया॒ सह
रा॒य॒स्पोषे॑णे – त्या॒हा ऽऽ*शि॑ष॒मे॒वैता॑मा शा॒स्त आपो॑ दे॒वीः

शु॒द्धा॒यु॒व इ॒त्या॒ह यथा॑य॒जुरे॒वैत॑त् ॥ 44

TS 6.3.8.4 - Padam

आ॒ता॒ना इ॒त्या॑ – ता॒नाः । ते॒भ्यः । ए॒व । न॑मः । क॒रोति॑ । अ॒न॒र्वा ।
प्रेति॑ । इ॒हि । इति॑ । आ॒ह । भ्रा॑तृ॒व्यः । वै । अ॒र्वा । भ्रा॑तृ॒व्याप॑नु॒त्या
इति॑ भ्रा॑तृ॒व्य – अ॒प॒नु॒त्यै । घृ॑त॒स्य । कु॒ल्याम् । अ॒न्वि॒ति । सह॑ ।
प्र॒जये॑ति प्र – जया॑ । सह॑ । रा॒यः । पोषे॑ण । इति॑ । आ॒ह ।
आ॒शि॒ष॒मि॒त्या॑ – शि॒षम् । ए॒व । ए॒ताम् । एति॑ । शा॒स्ते । आपः॑ ।
दे॒वीः । शु॒द्धा॒यु॒व इति॑ शु॒द्ध – यु॒वः । इति॑ । आ॒ह ।
यथा॑य॒जुरिति॑ यथा – य॒जुः । ए॒व । ए॒तत् ॥ 44 (37)

(लो॒काय॑ नी॒यते॑ यद् – ब॒र्ही – र॒मयः॑ – स॒प्तत्रिं॑शच्च) (A8)

TS 6.3.9.1

प॒शोर्वा॑ आ॒लब्ध॑स्य प्रा॒णाञ्छु॑गृच्छति॒ वाक् आ॑ प्या॒यतां॑ प्रा॒णस्त॑ आ
प्या॒यता॑मि॒त्याह॑ प्रा॒णेभ्य॑ ए॒वास्य॑ शुच॑ श॒मय॑ति सा प्रा॒णेभ्यो॑ऽधि
पृ॒थि॒वीञ् शुक्॑ प्र वि॒शति॑ श॒महो॑भ्यामि॒ति नि॑ न॒यत्य॑हो॒रात्रा॑भ्यामे॒व
पृ॒थि॒व्यै शुच॑ श॒मय॑त्योष॒धे त्रा॑यस्वै॒नऽस्व॑धिते॒ मै॒नऽ

हि॑सीरि॒त्याह॑ वज्रो॒ वै स्व॑धितिः- [] 45

TS 6.3.9.1 - Padam

प॒शोः । वै । आ॒लब्ध॑स्ये॒त्या – ल॒ब्ध॑स्य । प्रा॒णानि॑ति॒ प्र – अ॒नान् ।
शुक् । ऋ॒च्छति॑ । वाक् । ते । ए॒ति । प्या॒यता॑म् । प्रा॒ण इति॑
प्र – अ॒नः । ते । ए॒ति । प्या॒यता॑म् । इति॑ । आ॒ह । प्रा॒णेभ्य॑ इति॑
प्र – अ॒नेभ्यः॑ । ए॒व । अ॒स्य । शुच॑म् । श॒मय॑ति । सा ।
प्रा॒णेभ्य॑ इति॑ प्र – अ॒नेभ्यः॑ । अधी॑ति । पृ॒थि॒वीम् । शुक् । प्रेति॑ ।
वि॒शति॑ । शम् । अ॒हो॑भ्यामि॒त्यहः॑ – भ्याम् । इति॑ । नीति॑ । न॒यति॑ ।
अ॒हो॒रात्रा॑भ्यामि॒त्यहः॑-रा॒त्राभ्या॑म् । ए॒व । पृ॒थि॒व्यै । शुच॑म् । श॒मय॑ति ।

ओष॑धे । त्रा॑यस्व । ए॒नम् । स्व॑धि॒त इति॑ स्व – धि॒ते । मा । ए॒नम् ।

हि॒॒सीः । इति॑ । आ॒ह । वज्रः॑ । वै ।

स्व॑धि॒तिरिति॑ स्व – धि॒तिः । 45 (50)

TS 6.3.9.2

शान्त्यै॑ पा॒र्श्वत॑ आ च्छ॑यति मद्ध्यतो॑ हि म॒नुष्या॑ आ च्छ॑यन्ति
ति॒रश्ची॑न॒मा च्छ॑यत्यनू॒चीन॑ हि म॒नुष्या॑ आ॒च्छ॑यन्ति व्यावृ॑त्यै रक्ष॑सां
भा॒गोऽसी॑ति स्थवि॒मतो ब॒र्हि॒रक्त्वाऽपा॑स्यत्यस्नै॒व रक्षा॑सि नि॒रव॑दयत
इ॒दम॒ह रक्षो॑ऽध॒मं तमो॑ नयामि योऽस्मा॑न् द्वेष्टि॒ यं च॑ व॒यं द्वि॒ष्म
इत्या॑ह द्वौ वाव॑ पुरुषौ॒ यं चै॒व – [] 46

TS 6.3.9.2 - Padam

शान्त्यै॑ । पा॒र्श्वतः॑ । ए॒ति । छ॑यति । म॒द्ध्यतः॑ । हि । म॒नुष्याः॑ ।
आ॒च्छ॑यन्तीत्या – छ॑यन्ति । ति॒रश्ची॑नम् । ए॒ति । छ॑यति । अ॒नूची॑नम् ।
हि । म॒नुष्याः॑ । आ॒च्छ॑यन्तीत्या – छ॑यन्ति । व्यावृ॑त्या इति॑
वि – आ॒वृ॒त्यै । रक्ष॑साम् । भा॒गः । अ॒सि । इति॑ । स्थवि॒मतः॑ ।
ब॒र्हिः । अ॒क्त्वा । अ॒पेति॑ । अ॒स्यति॑ । अ॒स्ना । ए॒व । रक्षा॑सि ।

नि॒र॒व॒द॒य॒त॒ इति॑ निः – अ॒व॒द॒य॒ते । इ॒द॒म् । अ॒ह॒म् । र॒क्षः॑ । अ॒ध॒म॒म् ।
त॒मः॑ । न॒य॒मि॑ । यः । अ॒स्म॒न् । द्वेष्टि॑ । य॒म् । च॒ । व॒य॒म् । द्वि॒ष्मः॑ ।
इति॑ । आ॒ह॒ । द्वौ । वा॒व॒ । पु॒रु॒षौ । य॒म् । च॒ । ए॒व । 46 (50)

TS 6.3.9.3

द्वेष्टि॑ यश्चैनं॑ द्वेष्टि॑ तावु॑ भा॒व॒ध॒मं॑ त॒मो॑ न॒य॒ती॒षे॑ त्वेति॑
व॒पा॒मु॒त्खि॑दती॒च्छ॒त॒ इ॒व॒ ह्ये॒ष॒ यो॑ य॒ज॒ते॒ यदु॑प॒तृ॒न्धाद्–रु॒द्रो॑ऽस्य
प॒शून्॑ घा॒तु॒कः॑ स्याद् यन्नो॑प॒तृ॒न्धा–द॒य॒ता॑ स्या–द॒न्य॒यो॑प॒तृ॒ण॒त्य॒न्य॒या॒
न॒ धृ॒त्यै॑ घृ॒तेन॑ द्या॒वापृ॑थि॒वी प्रो॒र्ण्वा॑था॒मि॒त्या॒ह॒ द्या॒वापृ॑थि॒वी ए॒व
र॒से॒ना॒न॒क्त्य॑च्छि॒न्नो– [] 47

TS 6.3.9.3 - Padam

द्वेष्टि॑ । यः । च॒ । ए॒न॒म् । द्वेष्टि॑ । तौ । उ॒भौ । अ॒ध॒म॒म् । त॒मः॑ ।
न॒य॒ति॑ । इ॒षे॑ । त्वा॒ । इति॑ । व॒पा॒म् । उ॒दि॒ति॑ । खि॒द॒ति॑ । इ॒च्छ॒ते॑ ।
इ॒व॒ । हि॒ । ए॒षः॑ । यः । य॒ज॒ते॒ । यत् । उ॒प॒तृ॒न्धा॑दि॒त्यु॒प – तृ॒न्धा॑त् ।
रु॒द्रः॑ । अ॒स्य॑ । प॒शून्॑ । घा॒तु॒कः॑ । स्या॒त् । यत् । न॒ ।
उ॒प॒तृ॒न्धा॑दि॒त्यु॒प – तृ॒न्धा॑त् । अ॒य॒ता॑ । स्या॒त् । अ॒न्य॒या॑ ।

उ॒प॒तृ॒ण॒त्ती॒त्यु॒प – तृ॒ण॒त्ति॑ । अ॒न्यया॑ ॥ न । धृ॒त्यै॑ ॥ घृ॒तेन॑ ।
द्या॒वापृ॒थि॒वी इति॑ द्या॒वा-पृ॒थि॒वी । प्रेति॑ । ऊ॒र्ण्वा॒थाम् । इति॑ । आ॒ह ।
द्या॒वापृ॒थि॒वी इति॑ द्या॒वा – पृ॒थि॒वी । ए॒व । र॒सेन॑ । अ॒नक्ति॑ ।
अ॒च्छि॒न्नः । 47 (50)

TS 6.3.9.4

रा॒यः सु॒वीर॑ इत्या॒ह यथा॑य॒जुरे॒वैतत् क्रू॒रमि॒व वा ए॒तत् क॑रोति
यद् व॒पा-मु॒त्खि॒द-त्यु॒र्वन्त॑रि॒क्ष-म॒न्वि॒हीत्या॒ह शान्त्यै॑ प्र वा
ए॒षोऽस्मा॑ल्लो॒काच्च्य॑वते यः प॒शुं मृ॒त्यवे॑ नी॒यमा॑नमन्वा॒रभ॑ते
व॒पाश्र॑प॒णी पु॒नर॑न्वा॒रभ॑तेऽस्मि॒न्नेव॑ लो॒के प्र॒ति ति॑ष्ठत्यग्नि॒ना
पु॒रस्ता॑देति॒ रक्ष॑सा॒मप॑हत्या अथो॑ दे॒वता॑ ए॒व ह॒व्येना॑- [] 48

TS 6.3.9.4 - Padam

रा॒यः । सु॒वीर॑ इति॑ सु – वी॒रः । इति॑ । आ॒ह । यथा॑य॒जुरिति॑
यथा – य॒जुः । ए॒व । ए॒तत् । क्रू॒रम् । इ॒व । वै । ए॒तत् । क॑रोति ।
यत् । व॒पाम् । उ॒त्खि॒दती॑त्युत् – खि॒दति॑ । उ॒रु । अ॒न्तरि॑क्षम् ।
अ॒न्विति॑ । इ॒हि । इति॑ । आ॒ह । शान्त्यै॑ । प्रेति॑ । वै । ए॒षः । अ॒स्मात् ।

लो॒कात् । च्य॒वते॑ । यः । प॒शुम् । मृ॒त्यवे॑ । नी॒यमा॑नम् । अ॒न्वा॒रभ॑त
इत्य॒नु – आ॒रभ॑ते । व॒पाश्र॑पणी इति व॒पा – श्र॑पणी । पुनः ।
अ॒न्वा॒रभ॑त इत्य॒नु – आ॒रभ॑ते । अ॒स्मिन् । ए॒व । लो॒के । प्र॒तीति॑ ।
ति॒ष्ठति॑ । अ॒ग्निना॑ । पु॒रस्ता॑त् । ए॒ति । र॒क्ष॒साम् ।
अप॑ह॒त्या इत्य॑प-ह॒त्यै । अथो॑ इति । दे॒वताः॑ । ए॒व । ह॒व्येन॑ । 48 (50)

TS 6.3.9.5

–न्वेति॑ ना॒न्तम॑म॒ङ्गा॒रम॑ति ह॒रेद् यद॑न्तमम॒ङ्गा॒रम॑ति ह॒रेद्-दे॒वता॑ अति॑
म॒न्येत॑ वा॒यो वी॑हि स्तो॒काना॑मित्या॒ह तस्मा॑द् वि॒भक्ताः॑ स्तो॒का अव॑
प॒द्यन्ते॑ऽग्रं वा ए॒तत् प॑शूनां यद् व॒पाऽग्र॑मोष॒धीनां॑ ब॒र्हि॒रग्रे॑णै॒वाग्र॑
सम॑दर्ध॒यत्य॑थो ओष॒धीष्वे॒व प॑शून् प्र॒तिष्ठा॑पयति स्वाहा॒कृती॑भ्यः
प्रेष्ये॒त्याह॑- [] 49

TS 6.3.9.5 - Padam

अ॒न्विति॑ । ए॒ति । न । अ॒न्तम॑म् । अ॒ङ्गा॒रम् । अ॒तीति॑ । ह॒रेत् । यत् ।
अ॒न्तम॑म् । अ॒ङ्गा॒रम् । अ॒तिह॑रेदित्यति – ह॒रेत् । दे॒वताः॑ । अ॒तीति॑ ।
म॒न्येत॑ । वा॒यो इति॑ । वी॒ति । इ॒हि । स्तो॒काना॑म् । इति॑ । आ॒ह ।

तस्मात् । विभक्ता इति वि – भक्ताः । स्तोकाः । अवेति । पद्यन्ते ।
अग्रम् । वै । एतत् । पशूनाम् । यत् । वपा । अग्रम् । ओषधीनाम् ।
बर्हिः । अग्रेण । एव । अग्रम् । समिति । अर्द्धयति । अथो इति ।
ओषधीषु । एव । पशून् । प्रतीति । स्थापयति । स्वाहाकृतीभ्य इति
स्वाहाकृति – भ्यः । प्रेति । इष्य । इति । आह । 49 (50)

TS 6.3.9.6

यज्ञस्य समिष्ट्यै प्राणापानौ वा एतौ पशूनां यत् पृषदाज्यमात्मा वपा
पृषदाज्यमभिघार्य वपामभि घारयत्यात्मन्नेव पशूनां प्राणापानौ दधाति
स्वाहोर्ध्वनभसं मारुतं गच्छतमित्याहोर्ध्वनभा ह स्म वै मारुतो
देवानां वपाश्रपणी प्र हरति तेनैवैने प्र हरति विषूची प्र हरति
तस्माद् विष्वञ्चौ प्राणापानौ ॥ 50

TS 6.3.9.6 - Padam

यज्ञस्य । समिष्ट्या इति सं-इष्ट्यै । प्राणापानाविति प्राण-अपानौ ।
वै । एतौ । पशूनाम् । यत् । पृषदाज्यमिति पृषत् – आज्यम् ।
आत्मा । वपा । पृषदाज्यमिति पृषत् – आज्यम् ।

अ॒भि॒घार्ये॑त्य॒भि – घा॒र्य॑ । व॒पाम् । अ॒भी॒ति॑ । घा॒रय॑ति । आ॒त्मन् ।
 ए॒व । प॒शूना॑म् । प्रा॒णापा॑नावि॒ति प्रा॒ण – अ॒पा॒नौ । द॒धा॒ति॑ । स्वा॒हा ॥
 ऊ॒र्ध्व॒न॒भ॒स॒मि॒त्यू॒र्ध्व – न॒भ॒स॒म् । मा॒रु॒त॒म् । ग॒च्छ॒त॒म् । इति॑ ।
 आ॒ह । ऊ॒र्ध्व॒न॒भा इ॒त्यू॒र्ध्व – न॒भाः । ह॒ । स्म॒ । वै । मा॒रु॒तः ।
 दे॒वा॒ना॑म् । व॒पाश्र॑प॒णी इति॑ व॒पा – श्र॑प॒णी । प्रेति॑ । ह॒र॒ति॑ । ते॒न ।
 ए॒व । ए॒ने इति॑ । प्रेति॑ । ह॒र॒ति॑ । वि॒षू॒ची इति॑ । प्रेति॑ । ह॒र॒ति॑ ।
 तस्मा॑त् । वि॒ष्व॒ञ्चौ । प्रा॒णापा॑नावि॒ति प्रा॒ण – अ॒पा॒नौ ॥ 50 (46)

(स्व॒धि॒ति – श्रै॒वा – छि॒न्नो – ह॒व्ये॒ने – ष्ये॒त्या॒ह –

षट्च॑त्वारि॒ंशच्च॑) (A9)

TS 6.3.10.1

प॒शु॒मा॒ल॒भ्य॑ पु॒रो॒डा॒शं॑ नि॒र्व॒प॒ति॑ स॒मे॒ध॒मे॒वैन॑मा ल॒भ॒ते॑ व॒प॒या॑
 प्र॒च॒र्य॑ पु॒रो॒डा॒शे॒न प्र॑ च॒र॒त्यू॒र्ग्वै पु॒रो॒डा॒श ऊ॒र्ज॑मे॒व प॒शूनां॑
 म॒द॒ध्य॒तो द॒धा॒त्य॒थो प॒शो॒रे॒व छि॒द्र॒म॒पि॑ द॒धा॒ति॑ पृ॒ष॒दा॒ज्य॒स्यो॒प॒ह॒त्य॑
 त्रिः पृ॒च्छ॒ति॑ शृ॒तं ह॒वी(३)ः श॒मि॒त॒रि॒ति त्रि॒ष॒त्या हि॑ दे॒वा योऽशृ॑तं
 शृ॒त॒मा॒ह स॑ ए॒न॒सा प्रा॒णापा॑नौ वा ए॒तौ प॒शूनां॑ – [] 51

TS 6.3.10.1 - Padam

प॒शुम् । आ॒ल॒भ्ये॒त्या॑ – ल॒भ्य॑ । पु॒रो॒डा॒शम्॑ । नि॒रि॒ति॑ । व॒प॒ति॑ ।
स॒मे॒ध॒मि॒ति॑ स – मे॒धम् । ए॒व । ए॒नम् । ए॒ति॑ । ल॒भ॒ते॑ । व॒प॒या॑ ।
प्र॒च॒र्ये॒ति॑ प्र-च॒र्य॑ । पु॒रो॒डा॒शे॒न॑ । प्रे॒ति॑ । च॒र॒ति॑ । ऊ॒र्क् । वै ।
पु॒रो॒डा॒शः॑ । ऊ॒र्ज॑म् । ए॒व । प॒शू॒नाम् । म॒द्ध्य॒तः॑ । द॒धा॒ति॑ ।
अथो॒ इति॑ । प॒शोः॑ । ए॒व । छि॒द्रम् । अ॒पी॒ति॑ । द॒धा॒ति॑ ।
पृ॒षदा॒ज्य॒स्ये॒ति॑ पृ॒षत् – आ॒ज्य॒स्य॑ । उ॒प॒ह॒त्ये॒त्युप॑ – ह॒त्य॑ । त्रिः ।
पृ॒च्छ॒ति॑ । शृ॒तम् । ह॒वी॒(३)ः॑ । श॒मि॒तः॑ । इति॑ ।
त्रि॒ष॒त्या॒ इति॑ त्रि – स॒त्याः॑ । हि॒ । दे॒वाः॑ । यः । अ॒शृ॒तम् । शृ॒तम् ।
आ॒ह॑ । सः । ए॒न॒सा॑ । प्रा॒णा॒पा॒ना॒वि॒ति॑ प्रा॒ण – अ॒पा॒नौ॑ । वै ।

ए॒तौ । प॒शू॒नां॑ । 51 (50)

TS 6.3.10.2

यत् पृ॒षदा॒ज्यं॑ प॒शोः॑ ख॒लु॒ वा आ॒ल॒ब्ध॒स्य॑ हृ॒दय॒मा॒त्माऽभि॑ स॒मे॒ति॑
यत् पृ॒षदा॒ज्ये॒न॑ हृ॒दय॒-म॒भि॒घा॒रय॒त्या॒त्म॒न्ने॒व॑ प॒शू॒नां॑ प्रा॒णा॒पा॒नौ॑ द॒धा॒ति॑
प॒शु॒ना॒ वै दे॒वाः॑ सु॒व॒र्गं॑ लो॒क॒मा॒यन्॑ तेऽम॒न्य॒न्त॑ म॒नु॒ष्या॑

नोऽन्वाभविष्यन्तीति तस्य शिरः छित्त्वा मेधं प्राक्षारयन्त्स
प्रक्षोऽभवत् तत् प्रक्षस्य प्रक्षत्वं यत् प्लक्षशाखो-त्तरबर्हि-र्भवति
समेधस्यैव- [] 52

TS 6.3.10.2 - Padam

यत् । पृषदाज्यमिति पृषत् - आज्यम् । पशोः । खलु । वै ।
आलब्धस्येत्या - लब्धस्य । हृदयम् । आत्मा । अभि । समिति ।
एति । यत् । पृषदाज्येनेति पृषत् - आज्येन । हृदयम् ।
अभिघारयतीत्यभि - घारयति । आत्मन् । एव । पशूनाम् ।
प्राणापानाविति प्राण - अपानौ । दधाति । पशुना । वै । देवाः ।
सुवर्गमिति सुवः - गम् । लोकम् । आयन् । ते । अमन्यन्त ।
मनुष्याः । नः । अन्वाभविष्यन्तीत्यनु-आभविष्यन्ति । इति । तस्य ।
शिरः । छित्त्वा । मेधम् । प्रेति । अक्षारयन् । सः । प्रक्षः । अभवत् ।
तत् । प्रक्षस्य । प्रक्षत्वमिति प्रक्ष - त्वम् । यत् । प्लक्षशाखेति
प्लक्ष - शाखा । उत्तरबर्हिरित्युत्तर - बर्हिः । भवति ।
समेधस्येति स - मेधस्य । एव । 52 (50)

TS 6.3.10.3

प॒शो॒र॒व॒ द्य॒ति॒ प॒शुं॑ वै॒ ह्रि॒य॒मा॒ण॒ꣳ र॒क्षाꣳस्य॑नु॒ स॒च॒न्ते॒ऽन्त॒रा॒ यू॒पं॑
चाꣳꣳ*ह॒व॒नी॒यं॑ च॒ ह॒र॒ति॒ र॒क्ष॒साम॑प॒ह॒त्यै॑ प॒शो॒र्वा॑ आ॒ल॒ब्ध॑स्य॒ मनोꣳप॑
क्रा॒म॒ति॒ मनो॑ता॒यै॒ ह॒वि॒षोꣳव॑दी॒य॒मा॒न॒स्या॒नु॒ ब्रू॒ही॒त्या॒ह॒ मन॑ ए॒वा॒स्या॒व॑
रु॒न्ध॒ ए॒का॒द॒शा॒व॒दा॒ना॒न्य॒व॒ द्य॒ति॒ द॒श॒ वै॒ प॒शोः॑ प्रा॒णा॒ आ॒त्मै॒का॒द॒शो॑
या॒वा॒ने॒व॒ प॒शु॒स्त॒स्या॒व॒- [] 53

TS 6.3.10.3 - Padam

प॒शोः॑ । अ॒वे॒ति॒ । द्य॒ति॒ । प॒शु॒म् । वै॒ । ह्रि॒य॒मा॒ण॒म् । र॒क्षाꣳसि॑ ।
अ॒न्वि॒ति॒ । स॒च॒न्ते॒ । अ॒न्त॒रा॒ । यू॒प॒म् । च॒ ।
आ॒ह॒व॒नी॒य॒मि॒त्या॒ - ह॒व॒नी॒य॒म् । च॒ । ह॒र॒ति॒ । र॒क्ष॒साम् ।
अ॒प॒ह॒त्या॒ इ॒त्य॒प॒ - ह॒त्यै॑ । प॒शोः॑ । वै॒ । आ॒ल॒ब्ध॑स्ये॒त्या॒ - ल॒ब्ध॑स्य॒ ।
म॒नः॑ । अ॒पे॒ति॒ । क्रा॒म॒ति॒ । मनो॑ता॒यै॒ । ह॒वि॒षः॑ ।
अ॒व॒दी॒य॒मा॒न॒स्ये॒त्य॒व॒ - दी॒य॒मा॒न॒स्य॑ । अ॒न्वि॒ति॒ । ब्रू॒हि॒ । इ॒ति॒ । आ॒ह॒ ।
म॒नः॑ । ए॒व॒ । अ॒स्य॑ । अ॒वे॒ति॒ । रु॒न्धे॑ । ए॒का॒द॒श॒ ।
अ॒व॒दा॒ना॒नी॒त्य॒व॒ - दा॒ना॒नि॑ । अ॒वे॒ति॒ । द्य॒ति॒ । द॒श॒ । वै॒ । प॒शोः॑ ।

प्रा॒णा इति॑ प्र – अ॒नाः । आ॒त्मा । ए॒का॒द॒शः । या॒वान् । ए॒व । प॒शुः ।
तस्य॑ । अ॒वेति॑ । 53 (50)

TS 6.3.10.4

द्व॒ति हृ॒दय॑स्या॒ग्रेऽव॑ द्यत्यथ॑ जि॒ह्वाया॑ अथ॑ वक्ष॑सो यद्वै हृ॒दये॑नाभि॒गच्छ॑ति
तज्जि॒ह्वाया॑ वदति॑ यज्जि॒ह्वाया॑ वदति॑ तदु॒रसो॑ऽधि निर्व॑दत्येतद्वै
प॒शो॒र्यथा॑पूर्व॑ य॒स्यै॒वम॑वदाय॑ यथा॒काम॑-मु॒त्तरे॑षामवदति॑ यथा
पूर्व॑मे॒वास्य॑ प॒शो॒रवत्तं॑ भवति॑ मद्ध्य॒तो गु॒दस्या॑व द्व॒ति मद्ध्य॒तो हि
प्रा॒ण उ॒त्तम॑स्या॒व द्यत्यु॑- [] 54

TS 6.3.10.4 - Padam

द्व॒ति । हृ॒दय॑स्य । अ॒ग्रे । अ॒वेति॑ । द्व॒ति । अथ॑ । जि॒ह्वायाः॑ । अथ॑ ।
वक्ष॑सः । यत् । वै । हृ॒दये॑न । अ॒भि॒गच्छ॑तीत्यभि – गच्छ॑ति ।
तत् । जि॒ह्वाया॑ । वदति॑ । यत् । जि॒ह्वाया॑ । वदति॑ । तत् । उ॒रसः॑ ।
अ॒धि । नि॒रिति॑ । वदति॑ । ए॒तत् । वै । प॒शोः॑ । यथा॑पूर्वमिति॑
यथा – पूर्॒वम् । य॒स्य । ए॒वम् । अ॒वदा॑येत्यव – दा॒य ।
यथा॑काममिति॑ यथा – का॒मम् । उ॒त्तरे॑षामित्युत् – तरे॒षाम् ।

अ॒व॒द्यती॑त्य॒व – द्य॑ति । य॒था॒पू॒र्व॒मि॒ति यथा – पू॒र्व॒म् । ए॒व । अ॒स्य॒ ।
प॒शोः । अ॒व॒त्त॒म् । भ॒व॒ति । म॒द्ध्य॒तः । गु॒द॒स्य॒ । अ॒वे॒ति । द्य॑ति ।
म॒द्ध्य॒तः । हि । प्रा॒ण इति॑ प्र – अ॒नः । उ॒त्त॒म॒स्ये॒त्यु॒त् – त॒म॒स्य॒ ।
अ॒वे॒ति । द्य॑ति । 54 (50)

TS 6.3.10.5

–त्त॒मो हि प्रा॒णो यदी॑तरं॒ यदी॑तर–मु॒भय॑मे॒वाजा॑मि जा॒य॒मा॒नो वै
॥ ब्रा॒ह्म॒णस्त्रि॑भिर्ऋ॒णवा॑ जा॒य॒ते ब्र॒ह्म॒चर्ये॑ण॒र्षि॒भ्यो य॒ज्ञेन॑ दे॒वेभ्यः॑ प्र॒जया॑
पि॒तृ॒भ्य ए॒ष वा अ॒नृ॒णो यः पु॒त्री य॒ज्वा ब्र॒ह्म॒चा॒रि॒वासी॑ तद॒व॒दानै॑रे॒वाव॑
द॒य॒ते तद॒व॒दाना॑ना–म॒व॒दान॒त्वं दे॒वा॒सुराः सँय॑त्ता आ॒सन् ते दे॒वा
अ॒ग्नि॒मब्रु॑वन् त्वया॑ वी॒रे॒णा॒सुरा॑न॒भि भ॒वामे॒ति– [] 55

TS 6.3.10.5 - Padam

उ॒त्त॒म इत्यु॑त् – त॒मः । हि । प्रा॒ण इति॑ प्र – अ॒नः । य॒दि । इ॒तर॑म् ।
य॒दि । इ॒तर॑म् । उ॒भय॑म् । ए॒व । अ॒जा॒मि । जा॒य॒मा॒नः । वै । ब्रा॒ह्म॒णः ।
त्रि॒भि॒रि॒ति त्रि – भिः । ऋ॒णवे॑त्यृ॒ण – वा । जा॒य॒ते । ब्र॒ह्म॒चर्ये॑णे॒ति
ब्र॒ह्म – चर्ये॑ण । ऋ॒षि॒भ्य इत्यृ॑षि – भ्यः । य॒ज्ञेन॑ । दे॒वेभ्यः॑ ।

प्र॒जये॑ति॒ प्र – जया॑ । पि॒तृ॒भ्य इति॑ पि॒तृ – भ्यः॑ । ए॒षः । वै ।
अ॒नृ॒णः । यः । पु॒त्री । यज्वा॑ । ब्र॒ह्म॒चा॒रि॒वासी॑ति ब्र॒ह्म॒चा॒रि – वा॒सी ।
तत् । अ॒व॒दा॒नैरि॑त्यव – दा॒नैः॑ । ए॒व । अ॒वे॒ति । द॒य॒ते । तत् ।
अ॒व॒दा॒ना॒नामि॑त्यव – दा॒ना॒नाम् । अ॒व॒दा॒न॒त्वमि॑त्यव॒दान – त्वम् ।
दे॒वा॒सु॒रा इति॑ दे॒व – अ॒सु॒राः । सँय॑त्ता इति॑ सं – य॒त्ताः । आ॒स॒न् ।
ते । दे॒वाः । अ॒ग्नि॑म् । अ॒ब्रु॒वन् । त्वया॑ । वी॒रेण॑ । अ॒सु॒रान् ।
अ॒भी॒ति । भ॒वाम॑ । इति॑ । 55 (50)

TS 6.3.10.6

सो॒ऽब्र॒वीद् वरं॑ वृ॒णै प॒शो॒रु॒द्धा॒रमु॒द्धरा॑ इति॑ स ए॒तमु॒द्धा॒रमु॒द॒हर॑त
दोः पू॒र्वा॒र्धस्य॑ गु॒दं म॒द्ध्य॑तः श्रो॒णिं ज॒घ॒ना॒र्धस्य॑ ततो॑ दे॒वा अ॒भव॑न्
परा॑ऽसु॒रा यत् त्र्य॒ङ्गा॒णां॑ स॒म॒व॒द्य॑ति भ्रा॒तृ॒व्या॒भि॒भू॒त्यै भ॒व॒त्या॒त्म॒ना
परा॑ऽस्य॒ भ्रा॒तृ॒व्यो भ॒व॒त्य॒क्ष॒णया॑ऽव द्यति॑ तस्मा॑द॒क्ष॒णया॑ प॒श॒वो॑ऽङ्गा॒नि
प्र॒ ह॒र॒न्ति॑ प्र॒ति॒ष्ठि॒त्यै ॥ 56

TS 6.3.10.6 - Padam

सः । अ॒ब्रवी॑त् । व॒रम् । वृ॒णै । प॒शोः । उ॒द्धार॑मित्युत् – हा॒रम् ।
उ॒दि॒ति॑ । ह॒रै । इ॒ति॑ । सः । ए॒तम् । उ॒द्धार॑मित्युत् – हा॒रम् । उ॒दि॒ति॑ ।
अ॒हर॑त् । दोः । पू॒र्वा॒र्ध॒स्ये॒ति॑ पू॒र्व – अ॒र्ध॒स्य॑ । गु॒दम् । म॒द्ध्य॒तः ।
श्रो॒णिम् । ज॒घ॒ना॒र्ध॒स्ये॒ति॑ ज॒घ॒न-अ॒र्ध॒स्य॑ । त॒तः । दे॒वाः ।
अ॒भ॒वन् । प॒रे॒ति॑ । अ॒सु॒राः । य॒त् । त्र्य॒ङ्गा॒णामि॒ति॑ त्रि – अ॒ङ्गा॒नाम् ।
स॒म॒व॒द्य॒ती॒ति॑ सं – अ॒व॒द्य॒ति॑ । भ्रा॒तृ॒व्या॒भि॒भू॒त्या इ॒ति॑
भ्रा॒तृ॒व्य-अ॒भि॒भू॒त्यै । भ॒व॒ति॑ । आ॒त्म॒ना । प॒रे॒ति॑ । अ॒स्य॑ । भ्रा॒तृ॒व्यः ।
भ॒व॒ति॑ । अ॒क्ष॒ण॒या । अ॒वे॒ति॑ । द्य॒ति॑ । तस्मा॑त् । अ॒क्ष॒ण॒या । प॒श॒वः ।
अ॒ङ्गा॒नि । प्रे॒ति॑ । ह॒र॒न्ति॑ । प्र॒ति॒ष्ठि॒त्या इ॒ति॑ प्र॒ति – स्ति॒त्यै ॥ 56 (45)
(ए॒तौ प॑शूनाꣳ – स॒मे॒ध॒स्यै॒व – त॒स्याऽवो॑ – त॒म॒स्याव॑ द्य॒ती – ति –
पञ्च॑चत्वारिꣳश॒च्च) (A10)

TS 6.3.11.1

मे॒द॒सा स्रु॒चौ प्रो॒र्णा॒ति॑ मे॒दो॒रू॒पा वै प॒शवो॑ रू॒प॒मे॒व प॒शु॒षु द॒धा॒ति॑
यू॒ष॒न्न॒व॒धा॒य प्रो॒र्णा॒ति॑ र॒सो वा ए॒ष प॑शूनां य॒द्वू र॒स॒मे॒व प॒शु॒षु द॒धा॒ति॑

पार्श्वे॑न वसा॑होमं प्रयौ॑ति म॒द्ध्यं॑ वा ए॒तत् प॑शूनां यत् पार्श्वे॑ रस॑
एष प॑शूनां यद्वसा॑ यत् पार्श्वे॑न वसा॑होमं प्रयौ॑ति म॒द्ध्यत॑ ए॒व
प॑शूनां रसं॑ दधा॑ति घ्नन्ति॑ – [] 57

TS 6.3.11.1 - Padam

मे॒दसा॑ । सु॒चौ॑ । प्रेति॑ । ऊ॒र्णोति॑ । मे॒दो॒रूपा॑ इति॑ मे॒दः – रू॒पाः ।
वै । प॒शवः॑ । रू॒पम् । ए॒व । प॒शुषु॑ । द॒धाति॑ । यू॒षन् ।
अ॒व॒धायेत्य॑व-धा॒य । प्रेति॑ । ऊ॒र्णोति॑ । रसः॑ । वै । ए॒षः । प॒शूनाम् ।
यत् । यूः॑ । रस॑म् । ए॒व । प॒शुषु॑ । द॒धाति॑ । पार्श्वे॑न । वसा॑होममि॑ति
वसा॑ – होम॑म् । प्रेति॑ । यौ॒ति । म॒द्ध्यम् । वै । ए॒तत् । प॒शूनाम् ।
यत् । पार्श्वे॑म् । रसः॑ । ए॒षः । प॒शूनाम् । यत् । वसा॑ । यत् ।
पार्श्वे॑न । वसा॑होममि॑ति वसा॑ – होम॑म् । प्र॒यौतीति॑ प्र – यौ॒ति ।
म॒द्ध्यतः॑ । ए॒व । प॒शूनाम् । रस॑म् । द॒धाति॑ । घ्नन्ति॑ । 57 (50)

TS 6.3.11.2

वा ए॒तत् प॒शुं य॑थ् सं॒ज्ञप॑यन्त्यैन्द्रः॑ खलु॑ वै दे॒वत॑या प्रा॒ण
ऐन्द्रो॑ऽपान ऐन्द्रः॑ प्रा॒णो अ॒ङ्गे अ॒ङ्गे नि दै॒द्ध्यदि॑त्याह प्रा॒णापा॑नावे॒व

प॒शु॒षु॑ द॒धा॒ति॑ दे॒व॒ त्व॒ष्ट॒र्भू॒रि॑ ते स॒ꣳ स॒मे॒त्वित्या॑ह त्वा॒ष्ट्रा हि
दे॒व॒तया॑ प॒श॒वो॑ वि॒षु॒रूपा॑ यत् स॒ल॒क्ष्मा॒णो भ॒व॒थेत्या॑ह वि॒षु॒रूपा॑ ह्ये॒ते
स॒न्तः स॒ल॒क्ष्मा॒ण ए॒तर्हि॑ भ॒व॒न्ति॑ दे॒व॒त्रा य॒न्त- [] 58

TS 6.3.11.2 - Padam

वै । ए॒तत् । प॒शुम् । यत् । स॒ꣳज॒पय॑न्तीति॒ सं - ज॒पय॑न्ति । ऐ॒न्द्रः ।
ख॒लु । वै । दे॒व॒तया॑ । प्रा॒ण इति॑ प्र - अ॒नः । ऐ॒न्द्रः ।
अ॒पा॒न इत्य॑प - अ॒नः । ऐ॒न्द्रः । प्रा॒ण इति॑ प्र - अ॒नः । अ॒ङ्गे॒अ॒ङ्ग
इत्य॑ङ्गे - अ॒ङ्गे । नी॒ति । दे॒द्ध्यत् । इति॑ । आ॒ह । प्रा॒णा॒पा॒नावि॑ति
प्रा॒ण - अ॒पा॒नौ । ए॒व । प॒शु॒षु । द॒धा॒ति॑ । दे॒व॒ त्व॒ष्टः । भू॒रि॑ । ते ।
स॒ꣳस॒मि॒ति॒ सं-स॒म् । ए॒तु । इति॑ । आ॒ह । त्वा॒ष्ट्राः । हि । दे॒व॒तया॑ ।
प॒श॒वः । वि॒षु॒रूपा॑ इति॒ वि॒षु - रू॒पाः । यत् । स॒ल॒क्ष्मा॒ण इति॑
स-ल॒क्ष्मा॒णः । भ॒व॒थ । इति॑ । आ॒ह । वि॒षु॒रूपा॑ इति॒ वि॒षु-रू॒पाः ।
हि । ए॒ते । स॒न्तः । स॒ल॒क्ष्मा॒ण इति॑ स - ल॒क्ष्मा॒णः । ए॒तर्हि॑ ।
भ॒व॒न्ति॑ । दे॒व॒त्रेति॑ दे॒व - त्रा । य॒न्तम् । 58 (50)

TS 6.3.11.3

–मवसे सखायोऽनु त्वा माता पितरो मदन्त्वित्याहा–नुमतमेवैनं
मात्रा पित्रा सुवर्गं लोकं गमयत्यर्धर्चे वसाहोमं जुहोत्यसौ वा
अर्धर्च इयमर्धर्च इमे एव रसेनानक्ति दिशो जुहोति दिश एव
रसेनानक्त्यथो दिग्भ्य एवोर्जꣳ रसमव रुन्धे प्राणापानौ वा एतौ
पशूनां यत् पृषदाज्यं वानस्पत्याः खलु– [] 59

TS 6.3.11.3 - Padam

अवसे । सखायः । अन्विति । त्वा । माता । पितरः । मदन्तु । इति ।
आह । अनुमतमित्यनु – मतम् । एव । एनम् । मात्रा । पित्रा ।
सुवर्गमिति सुवः – गम् । लोकम् । गमयति । अर्धर्च
इत्यर्ध–ऋचे । वसाहोममिति वसा – होमम् । जुहोति । असौ ।
वै । अर्धर्च इत्यर्ध–ऋचः । इयम् । अर्धर्च इत्यर्ध – ऋचः ।
इमे इति । एव । रसेन । अनक्ति । दिशः । जुहोति । दिशः । एव ।
रसेन । अनक्ति । अथो इति । दिग्भ्य इति दिक् – भ्यः । एव ।
ऊर्जम् । रसम् । अवेति । रुन्धे । प्राणापानाविति प्राण – अपानौ ।

वै । ए॒तौ । प॒शूना॑म् । यत् । पृ॒षदा॑ज्यमि॒ति पृ॑षत् – आ॒ज्यम् ।

वा॒नस्प॑त्याः । ख॒लु । 59 (50)

TS 6.3.11.4

वै दे॒वत॑या प॒शवो॑ यत् पृ॒षदा॑ज्यस्यो॒-प॒हत्या॑ऽऽ*ह वन॒स्पत॑येऽनु
ब्रू॒हि वन॒स्पत॑ये प्रे॒ष्येति॑ प्रा॒णापा॑नावे॒व प॒शुषु॑ द॒धात्य॑न्यस्या॒न्यस्य॑
सम॒वत्त॑ꣳ सम॒वद्य॑ति तस्मा॒न्नाना॑रूपाः प॒शवो॑ यू॒ष्णोप॑ सिञ्च॒ति रसो॑
वा ए॒ष प॒शूनां॑ यँद्वू रसमे॒व प॒शुषु॑ द॒धाती॑डामुप ह॒यते॑ प॒शवो॑ वा
इ॒डा प॒शूने॒वोप॑ ह॒यते॑ च॒तुरु॑प ह॒यते॑ – [] 60

TS 6.3.11.4 - Padam

वै । दे॒वत॑या । प॒शवः॑ । यत् । पृ॒षदा॑ज्यस्ये॒ति पृ॑षत् – आ॒ज्यस्य॑ ।
उ॒पह॑त्येत्युप – ह॒त्य । आ॒ह । वन॒स्पत॑ये । अ॒न्वि॒ति । ब्रू॒हि ।
वन॒स्पत॑ये । प्रे॒ति । इ॒ष्य । इ॒ति । प्रा॒णापा॑नावि॒ति प्रा॒ण – अ॒पानौ॑ ।
ए॒व । प॒शुषु॑ । द॒धा॒ति । अ॒न्यस्या॑न्यस्येत्यन्यस्य – अ॒न्यस्य॑ ।
सम॒वत्त॑मि॒ति सं – अ॒वत्त॑म् । सम॒वद्य॑तीति सं-अ॒वद्य॑ति । तस्मा॑त् ।
ना॒नारू॑पा इति ना॒ना-रू॑पाः । प॒शवः॑ । यू॒ष्णा । उ॒पेति॑ । सिञ्च॒ति ।

र॒सः । वै । ए॒षः । प॒शूना॑म् । यत् । यूः । र॒सम् । ए॒व । प॒शु॑षु ।
 द॒धा॒ति॒ । इ॒डा॒म् । उ॒पे॒ति॒ । ह॒य॒ते॒ । प॒श॒वः॑ । वै । इ॒डा॒म् । प॒शून् ।
 ए॒व । उ॒पे॒ति॒ । ह॒य॒ते॒ । च॒तुः॑ । उ॒पे॒ति॒ । ह॒य॒ते॒ । 60 (50)

TS 6.3.11.5

च॒तु॒ष्पा॒दो॒ हि॒ प॒श॒वो॒ यं॒ का॒म॒ये॒ता॒ प॒शुः॑ स्या॒दि॒त्य॒मे॒द॒स्कं॑ तस्मा॒ आ
 द॒द्ध्य॒ान्मे॒दो॒रूपा॑ वै प॒श॒वो॒ रू॒पे॒णै॒वैनं॑ प॒शु॒भ्यो॒ निर्भ॑ज॒त्य॒प॒शु॒रे॒व
 भ॒व॒ति॒ यं॒ का॒म॒ये॒त॒ प॒शु॒मा॒न्त् स्या॒दि॒ति॒ मे॒द॒स्व॒त् तस्मा॒ आ
 द॒द्ध्य॒ान्मे॒दो॒रूपा॑ वै प॒श॒वो॒ रू॒पे॒णै॒वा॒स्मै प॒शू॒न॒व॒ रु॒न्धे॒ प॒शु॒मा॒ने॒व
 भ॒व॒ति॒ प्र॒जा॒प॒तिर्य॑ज्ञ॒म॒सृ॒ज॒त॒ स॒ आ॒ज्यं॑- [] 61

TS 6.3.11.5 - Padam

च॒तु॒ष्पा॒द॒ इति॑ च॒तुः॑ - पा॒दः॑ । हि॒ । प॒श॒वः॑ । यम् । का॒म॒ये॒त॒ ।
 अ॒प॒शुः॑ । स्या॒त् । इति॑ । अ॒मे॒द॒स्क॒मि॒त्य॒मे॒दः॑-क॒म् । तस्मै॑ । ए॒ति॒ ।
 द॒द्ध्य॒ात् । मे॒दो॒रूपा॑ इति॑ मे॒दः॑-रू॒पाः॑ । वै । प॒श॒वः॑ । रू॒पे॒ण॑ ।
 ए॒व । ए॒न॒म् । प॒शु॒भ्य॒ इति॑ प॒शु॒-भ्यः॑ । नि॒रि॒ति॒ । भ॒ज॒ति॒ । अ॒प॒शुः॑ ।
 ए॒व । भ॒व॒ति॒ । यम् । का॒म॒ये॒त॒ । प॒शु॒मा॒नि॒ति॒ प॒शु॒ - मा॒न् । स्या॒त् ।

इति॑ । मे॒दस्व॑त् । तस्मै॑ । ए॒ति॑ । द॒द्ध्या॑त् । मे॒दो॒रूपा॑ इति॑
मे॒दः – रू॒पाः । वै । प॒शवः॑ । रू॒पेण॑ । ए॒व । अ॒स्मै । प॒शून् ।
अवे॑ति । रु॒न्धे । प॒शुमा॑निति॑ प॒शु – मा॒न् । ए॒व । भ॒वति॑ ।
प्र॒जाप॑तिरिति॑ प्र॒जा-प॑तिः । य॒ज्ञम् । अ॒सृज॑त । सः ।
आ॒ज्यं॑ । 61 (50)

TS 6.3.11.6

पु॒रस्ता॑दसृज॑त प॒शुं म॑द्ध्यतः पृ॒षदा॑ज्यं प॒श्चात् तस्मा॑दाज्ये॒न
प्र॒याजा॑ इ॒ज्यन्ते॑ प॒शुना॑ म॑द्ध्यतः पृ॒षदा॑ज्येना-नू॒याजा-
स्तस्मा॑दे॒तन्मिश्र॑मिव प॒श्चात् सृष्ट॑ ह्ये॒काद॑शानू॒याजान् य॑जति॒ दश॑
वै प॒शोः प्रा॒णा आ॒त्मैका॑द॒शो या॑वा॒नेव॑ प॒शुस्त॑मनु॒ यज॑ति॒ घ्नन्ति॑ वा
ए॒तत् प॒शुं य॑त् सं॒ज्ञप॑यन्ति प्रा॒णापा॑नौ ख॒लु वा ए॒तौ प॒शूनां॑ य॑त्
पृ॒षदा॑ज्यं य॑त् पृ॒षदा॑ज्येना () नू॒याजान् य॑जति प्रा॒णापा॑नावे॒व प॒शुषु॑
द॒धाति॑ ॥ 62

TS 6.3.11.6 - Padam

॥
पुरस्तात् । असृजत् । पशुम् । मद्ध्यतः । पृषदाज्यमिति
पृषत् – आज्यम् । पश्चात् । तस्मात् । आज्येन ।
प्रयाजा इति प्र – याजाः । इज्यन्ते । पशुना । मद्ध्यतः ।
पृषदाज्येनेति पृषत् – आज्येन । अनूयाजा इत्यनु – याजाः ।
॥
तस्मात् । एतत् । मिश्रम् । इव । पश्चात्सृष्टमिति पश्चात् – सृष्टम् ।
हि । एकादश । अनूयाजानित्यनु – याजान् । यजति । दश ।
वै । पशोः । प्राणा इति प्र – अनाः । आत्मा । एकादशः । यावान् ।
एव । पशुः । तम् । अन्विति । यजति । घ्नन्ति । वै । एतत् ।
पशुम् । यत् । संज्ञपयन्तीति सं – ज्ञपयन्ति । प्राणापानाविति
प्राण – अपानौ । खलु । वै । एतौ । पशूनाम् । यत् ।
पृषदाज्यमिति पृषत् – आज्यम् । यत् । पृषदाज्येनेति
पृषत् – आज्येन () । अनूयाजानित्यनु – याजान् । यजति ।
प्राणापानाविति प्राण – अपानौ । एव । पशुषु । दधाति ॥ 62 (56)

पद पाठे (वाक्य सहित) – षष्ठकाण्डे तृतीयः प्रश्नः

(घ्नन्ति – यन्तं – खलु – चतुरूपं ह्वयत – आज्यं – यत्
पृषदाज्येन – षट् च) (A11)

Prasna Korvai with starting Padams of 1 to 11 Anuvaakams :-

(चात्वालात् – सुवर्गाय यद् वैसर्जनानि – वैष्णव्यर्चा – पृथिव्यै –
साध्या – इषे त्वे – त्यग्निना – पर्यग्नि – पशोः – पशुमालभ्य –
मेदसा स्रुचा – वेकादश)

Korvai with starting Padams of 1, 11, 21 Series of Panchaatis :-

(चात्वालाद् – देवानुपैति – मुञ्चति – प्रहियमाणाय – पर्यग्नि –
पशुमालभ्य – चतुष्पादो – द्विषष्टिः)

First and Last Padam of Third Prasnam of 6th Kandam

(चात्वालात् – पशुषु दधाति)

॥ हरिः ओं ॥

॥ कृष्ण यजुर्वेदीय तैत्तिरीय संहितायां पद पाठे

षष्ठकाण्डे तृतीयः प्रश्नः समाप्तः ॥

पद पाठे (वाक्य सहित) – षष्ठकाण्डे तृतीयः प्रश्नः

Details of Panchati and Padam for Kandam 6 , Prasanam 3 (TS 6.3)

	Panchati	Padams
Anuvakam 1	6	314
Anuvakam 2	6	300
Anuvakam 3	6	319
Anuvakam 4	9	442
Anuvakam 5	4	218
Anuvakam 6	4	210
Anuvakam 7	5	268
Anuvakam 8	4	187
Anuvakam 9	6	296
Anuvakam 10	6	295
Anuvakam 11	6	306
Total →	62	3155

Notes:

1. Please refer to the book “TS Kandam 1” and “TS 1.1 pada paadam with Vaakyam” for notes and conventions used in this Compilation.
2. Please download our vedic compilations from our web site www.vedavms.in